

東坡齋
叢書

唐賈耽記邊州人四夷道里考實

三

唐賈耽記邊州入四夷道里考實卷三

錢塘吳承志纂

吳興劉承幹校

安南至永昌地里考實

安南經交趾太平百餘里至峰州又經南田百三十里至恩樓縣乃水行四十里至忠城州又二百里至多利州又三百里至朱貴州又四百里至丹棠州皆生獠也又四百五十里至古湧步水路距安南凡千五百五十里又百八十里經浮動山天井山山上夾道皆天井間不容跬者三十里二日行至湯泉州又五十里至祿索

州又五十里至龍武州皆爨蠻安南境也又八十三里至儻遲頓又經八平城八十里至洞澡水又經南亭百六十里至曲江劍南地也又經通海鎮百六十里渡海河利水至絳縣又八十里至晉甯驛戎州地也又八十里至柘東城又八十里至安甯故城又四百八十里至靈南城又八十里至白崖城又七十里至蒙舍城又八十里至龍尾城又十里至太和城又二十五里至羊苴咩城自羊苴咩城西至永昌故郡三百里 此自今越南北圻河內省懷德府永順縣至雲南永昌府保山縣之道唐安南都護府初治交趾後徙宋平木志安南中

都護府下云本交趾郡武德五年曰交州治交趾調露
元年曰安南都護府至德二載曰鎮南都護府大曆三
年復爲安南寶曆元年徙治宋平寶曆二字有誤元和
郡縣志安南管州十三交州爲府理所管縣八宋平隸
郭下元和時府治已在宋平非至寶曆初始徙交州總
敘大曆三年下有置經略使其下又有貞元六年又加
招討處置使兩文疑徙治卽在加招討處置使之年寶
曆元年本作貞元六年傳寫涉上大曆之文誤衍曆字
於貞下校者因改貞爲寶而刪去六字致與元和志說
不合賈記作於貞元九年以後此治當據後徙之所而

言所云交趾亦非武德中所置之故縣宋平注云武德四年置宋州并置宏教南定二縣五年析置交趾懷德二縣隸交州六年曰南宋州貞觀元年州廢省宏教懷德徙交趾于故南慈州來屬交趾注云武德四年置慈州并置慈廉烏延武立三縣以慈廉水因名之六年曰南慈州貞觀元年州廢省三縣更置交州徙後交趾治今慈廉縣故交趾與宏教懷德並入宋平宋平今永順與慈廉接界元和志云交趾東南至府一十五里宋平西少北卽交趾太平寰宇記作七十里兩數差五十五交趾本有烏延武立兩故縣地烏延差南武立偏西元

和以後蓋移治武立故與舊經不同故治去永順止十
五里當尙在今永順界中元和志云本漢龍編縣地隋
開皇十年分置交趾縣泊江水西北自崇平縣界流入
至此故名慈廉水北去縣四十步泊江水謂櫟榆水支
流瀦而爲泊今名西湖慈廉水爲蘇瀝江盛氏慶紱越
南地輿圖說云西湖一名浪泊一名霍潭在永順縣西
接慈廉縣界珥河抱其北蘇瀝遶其南漢馬援駐軍於
此黎朝避諱始改爲西湖後避鄭王諱又改爲兌湖珥
河一名瀘江一名富良江在大羅城之左上接三帶白
鶴江經北甯順安府嘉林縣愛慕臨游等社下接蒞仁

之大黃入於海明永樂十一年工部尙書黃福以其江
流灣曲如垂珥又名爲珥河蘇瀝江在城之東從珥河
分流沿城北轉而西抵青池之河柳社與銳江合其江
冬春乾涸秋夏通舟唐高駢據羅城時見一人髮白貌
奇從小江而上駢問之對曰我姓蘇名瀝倏然不見駢
知其爲神因名蘇瀝江明黃福更名來蘇江西湖蘇瀝
江及瀘江俱本明統志而蘇瀝江說不純同西湖與瀘
江亦間有詳略明統志外國安南山川類來蘇江下云
一名蘇歷江自交州府城東北轉而西行直抵銳江昔
有人名蘇歷者開此故名蘇歷爲始開此江之人姓名

陳書高祖紀已有梁大同十一年六月軍至交州李貴
眾數萬於蘇歷江口立城柵以拒官軍之文江名遠出
梁前非唐世所命高駢益易後改之慈廉及烏延等名
復爲蘇歷越中記載敘述不詳地輿圖說取以易明統
志失未考合陳紀大羅城卽明交州府城今河內都城
在舊懷德縣東南徐氏延旭越南世系沿革略云古龍
編城府名今仍蒙宋平所屬故縣稱懷德縣名別爲壽
昌陳氏兆桐萬國輿圖亞細亞東部圖河內方位準點
在赤道北二十度四十分英東百六度城始徙於阮元
喜增廣於高駢越史略歷代守任傳阮元喜傳云穆宗

長慶二年爲安南都護以城門有逆水恐州人多出反
叛因卜今城時方築小城相者卜曰君力不足修大城
至咸通中高駢乃增築羅城阮元喜爲長慶時節度徙
治在元和後其先別有張伯儀所築之羅城彼羅城爲
宋平外城卽阮元喜所謂門當逆水者明統志誤與徙
築之小城合同爲一小城爲今王城中之第二重城魏
氏源 聖武記乾隆征撫安南記云國城環土壘高
不數尺上植叢竹內有甌城二則王所居土城卽高駢
所築之大羅城其垣本高至二丈五尺脚廣二丈六尺
今夷圯止存下基二甌城一是龍編舊城一爲阮元喜

所築寰宇記龍編下失未補綴元史地理志安南郡縣附錄以仙州爲古龍編仙州亦唐名後廢入平道與龍編並屬交州本志平道注云武德四年曰道州六年曰南道州是年更名仙州貞觀十年州廢以平道來屬龍編注云貞觀元年隸仙州州廢來屬仙州舊治平道元和志云平道西北至府五十里寰宇記作六十里其地在龍編東龍編下云西北至府四十五里朱鷺江在北卽楛榆水之一源也朱鷺江卽越南地輿圖說之珥河明統志所謂富良江一名瀘江者今呼爲紅江上流承南詔楛榆河東出之瀘水下流經朱鷺因蒙其縣爲名

北兼東言平道實在此江之東與龍編隔岸龍編曾隸
仙州非仙州卽龍編同康廬中外地輿圖說集成附刻
安南舊圖奉天府左側注有龍編城三字奉天卽今懷
德此出越中考究古跡者所傳較元志附錄之說爲確
龍編去交趾六十里交趾城南四十步卽蘇厯其流有
順逆蓋水盛時首受朱鷲江由宋平而西爲順水涸轉
受泊江東至宋平羅城之下爲逆交趾當瀕近大泊明
統志所云銳江在蘇厯江曲之直西宜卽兌江以兌湖
得名合處在明慈廉縣東越南地輿圖說云抵青池之
河柳社始合青池爲明統志福安州屬之清潭與英菴

接壤英畱爲福安州治似卽越南地輿圖說之上福後
爲常信府屬縣常信今改名興化薛氏福成績瀛環志
略初編越南志後卷越南三圻考云興化府轄情懷山
沔二縣情懷爲清池改異之名山沔卽上福其地在蘇
瀝由西折東流合舊朱鷺江今紅江之處不與慈廉界
接蓋因泊江上游流斷蘇歷行其故渠無所合之水銳
江之名因移於下游泊江舊爲瀘江支出之水所潄鄴
道元水經葉榆河篇注云交州北二水東逕龍淵縣北
又東合南水南水自麓冷縣東逕封溪縣北又東逕浪
泊又東逕龍淵縣故城南又東左合北水建安二十三

年立州之始蛟龍蟠編于南北二津故改龍淵以龍編爲名龍淵卽龍編北水謂交趾北之瀘江南水卽泊江泊水本首受江江水入泊復自泊流出南行轉東合朱薦江元和志文至此下當有潛爲泊三字崇平應作隆平上條云武平縣西南至府九十里吳置武平郡隋廢郡立崇平縣武德四年改名武平崇平爲武平舊名治在宋平東北於交趾不得轉爲西北隆平卽太平在武平之西本志云太平本隆平武德四年置以縣置隆州并置義廉封溪二縣治義廉六年曰南隆州貞觀元年州廢省義廉以封溪隸峰州隆平來屬先天元年更名

隆平西南界峰州是在交趾西北崇字必隆之誤太平
縣下云西南至府六十里西字亦當作東後條朱鳶縣
東南至府五十里寰宇記據府方向改易始作東南此
東南舊文本作西北今本亦涉下東南而誤朱鳶在龍
編南五里其南九里又有一龍編故城爲三國吳末所
建西晉交州刺史治此漢龍編時廢入朱鳶故龍編江
稱朱鳶江本條交州故城下云在縣東十四里吳時刺
史陶璜所築交州故城卽龍編故城東下當更有南字
兩龍編俱在朱鳶江西若正東十四里應跨江入平道
界知南字爲傳寫脫去朱鳶在龍編故城北葉榆河注

敘龍編故城是以不及其縣後復敘南水始云又東南
逕九德郡北交州外域記曰交趾郡界有扶嚴究在郡
之北隔渡一江卽此水也江水對朱鳶縣又東逕浦陽
縣北南字舊誤作北戴氏震校本據永樂大典改正又
東逕浦陽縣北依上注引林邑記都官塞浦水東逕安
定縣之文當本作又東逕浦陽至安定縣北今脫三字
郡字亦應訂作邨口二字北下詳文義又當更有合一
水三字九德郡見溫水篇注治所在九真郡南宋書州
郡志九德太守治浦陽去州水九百於此遠不相接元
和志驩州下亦云九德縣本吳所立屬九德郡越裳縣

同宋平下乃云本漢日南郡西捲縣地宋分立宋平縣屬九德郡後改爲宋平郡隋開皇十年改屬交州漢日南在吳九德南西捲爲其治所如何錯入交趾界中此因摭合宋志宋平郡下孝武世分日南立宋平縣後爲郡之文而誤宋郡與縣自俱在日南與九德連界南齊書州郡志無此郡并無此縣時已並廢罷不置隋書地理志交趾郡宋平下云舊置宋平郡平陳郡廢大業初置交趾郡舊置謂梁陳所置名雖仍舊郡治不必盡同宋志宋平條後有隴蘇太守下云新立南齊志作龍蘇隸越州州敘云本合浦北界宋泰始中西江督護陳伯

沼啟立爲越州七年始置百梁隴蘇永寧安昌富昌南
流六郡割廣交朱戴三郡屬龍蘇地由交趾朱戴郡中
割出其名似出龍編蘇歷近唐宋平之地郡入梁興百
梁永寧俱廢梁後復置宋平蓋僞治於故龍蘇隋志文
略元和志失考廢徙之跡致糾舛不可以通西捲溫水
注以爲卽盧容水所出之區粟故城九德郡必不譌入
此次郡字與邨口二字形甚相近九德知別爲邨名其
地在朱鷺江東當屬平道交趾郡吳時治龍編建安以
前治羸隴羸隴元和志作羸隴云故城在宋平縣西七
十五里後漢交州刺史理於此又云南定縣東北至府

六十里本漢羸樓縣地羸樓去南定十五里在宋平西南於龍編故城亦爲西南扶巖究在扶巖夷地跨武平及平道二縣是在郡東北寰宇記武平北有武定江云州北至武平縣界武定江源二百五十二里江流甚長爲今京北之太平江支渠與紅江通絡越南三圻考云富良江太平江之間有運河三道東西貫注爲二江之穿索一曰灘河在河內之北二曰渡河在海陽之南三曰竹河在興安之南興安省治快州府附郭之東安縣與山西夾紅江山沔爲故龍編地扶巖究水當由竹河流合九德卽竹河口之邨名浦陽謂都官塞浦之陽爲

里仁之青蕨江浦朱鳶在故龍編酈時龍編治漢舊縣
故龍編又復廢爲朱鳶屬城注上據南北二津界目標
故龍編此補綴朱鳶縣名臚列已具寰宇記敘交州四
至八到云東至朱鳶縣界小黃江口水路五百三十里
南至朱鳶縣阿勞江口水路五百五十里朱鳶實州東
南邊縣不在腹中舊書地理志阿勞江口北至交州城
五百四十九里南字亦北之誤元和志州境下云東西
五百一十六里南北七百九十一里州北境止二百數
十里朱鳶偏東南近海地多荒曠不置縣有此長徑若
移置西北減縮當過半又阿勞江口與小黃江口所標

俱是入海之口小黃江由愛州流入不能移北阿勞江
口亦豈得移於上游顧氏祖禹方輿紀要廣西卷末外
國附考云朱戴城在交州府東南較越南地輿圖說以
白鶴西之安朗爲古朱鷺之說爲可據朱鷺不接峰州
太平界封溪自在武立東北越史略吳紀楊平王自立
後漢隱帝乾祐三年遣昌文將兵攻太平唐阮二邨昌
文行至慈廉反兵襲平王克之慈廉尙在太平東南證
據亦備慈廉後復爲縣隋志作交趾尙仍梁陳舊名本
志謂慈廉名出於水寰宇記云慈廉江昔有李祖仁居
此兄弟十人並慈孝廉讓因此名江李祖仁不知何代

人其文係於交趾下上別列烏延水與龍編流出之水
同名烏延當讀爲淤衍以時通時塞別爲殊目後亦因
其名立縣下流過宋平南至交趾界有李祖仁所居故
別名慈廉水蘇歷一江唐時又分爲二名宋志龍蘇今
據南齊志釋爲龍編蘇歷葉榆河注敘南北二水無所
合所分之支水蘇歷江開通似後在宋季陳紀標正名
爲蘇歷慈廉之名必出隋中葉烏延亦隋人所名元和
志通目爲慈廉宋平下云慈廣水經縣南二里慈廣爲
慈廉之誤北去縣二里據張伯儀未增築以前之城徑
而言此水卽寰宇記之烏延下條又云蘇晉江南去縣

二百步蘇晉亦當校作蘇曆曆爲歷字之通作字其水別敘在宋平之北與慈廉裂絕爲二則爲泊江口東出之瀘江與明統志說不同越史略阮紀太祖順天二年起含光殿於瀘東步太宗天瑞二年建太和橋於蘇歷江瀘與蘇歷各爲一江瀘東步今大羅城東北之東津渡明統志云東津渡在交州府東關縣瀘江舊以舟楫往來阻於風濤永樂初張輔沐晟始置浮橋橋歲一易東關卽壽昌江流至此尙仍瀘名慈廉北江必不易爲蘇歷太和橋所跨之江卽龍編之烏延水元和志慈廉水之上流於明統志所云不異陳本紀李賁聚眾立城

柵於蘇歷江口次在軍至交州之下交州時治龍編梁
書武帝紀交州戰地有朱鳶通鑑梁紀綴合其文云上
遣交州刺史楊暉討李賁以陳霸先爲前鋒至交州賁
率眾三萬拒之敗於朱鳶又敗於蘇歷江口賁奔嘉寧
城朱鳶之戰在拒守蘇歷江口以前越史略歷代守任
楊暉傳云州人阮賁反據龍編城自稱南越帝改元天
德國號萬春寔字記龍編下有萬春臺云李賁竊號作
此李賁都在龍編於朱鳶爲北戰地不當在南梁紀所
云朱鳶蓋卽元和志龍編北之朱鳶江紀文省去江口
二字胡三省注通鑑因誤以爲縣名朱鳶江卽東津渡

之瀘江蘇歷江口必亦謂太和橋所跨烏延江水之下
口李賁自朱鳶江口敗走保守泊江屯柵緣江西岸樹
立而城壘別立於慈廉江口之對岸以當舟師之衝故
云蘇歷江口明統志說又似有據寰宇記蘇歷正名綴
於南定下爲泊江下尾之稱亦謂烏延與慈廉之通目
其武平下又別列漏江云至縣改爲武平水西北自隆
平縣流入隆平江卽自泊江口東出流逕宋平之瀘江
漏江元和志作漏口江次在峰州八到下云南至漏口
江一百里寰宇記交州四至八到下敘西北至峰州陸
路一百三十里又敘西北至峰州嘉寧縣界漏江口水

陸一百五十里交州西北一百三十里爲峰州界元和志說同又西北二十里是在界外不得仍敘入界中水陸一百五十里亦謂自烏延江水行至其江曲東處登陸行向西南非西北北字當同元和志作南漏江爲嘉寧南舊句漏縣境中之江明統志云句漏山在石室縣相傳古句漏縣其下句漏入唐爲新昌元和志峰州總敘有新昌縣下云有夜郎溪後條佚闕漏江遂失其流跡惟存下口之名於八到下夜郎溪寰宇記作若耶溪云源出嘉寧縣西南下流當入新昌不知是否卽漏江之源方輿紀要云宣德初黎利作亂其弟善據廣威州

擁眾攻交趾參將馬瑛大破之於清威與王通合兵石室縣進寧橋陳洽以爲宜置師於石室縣之沙河以覘賊勢不聽遂渡河而陳地皆險惡伏起大敗石室有沙河下流不詳續志略摹列英人所繪西南亞洲圖旁附越南北圻圖中有一水綫自山西省西南十一分許迤東南聯合河內西南界之懸河水綫長約四十分許卽此河河口東北去河內準徑近三十五分去永順得減合百五十里元和志所云爲此口上流之徑懸河亦首受白鶴江於慈廉西安山東分支下流逕寧平省由懸申二口入海支津亦東合南定之紅江葉榆河注南水

下云其次一水東逕封溪縣南又西南逕西于縣南又東逕羸樓縣北又東逕北帶縣南又東逕稽徐縣涇水注之水出龍編縣高山東南流入稽徐縣注于中水。中水又東逕羸樓縣南又東南合南水。次一水卽蕙河涇水爲沙河羸樓縣上下兩見上七字當行龍編在南水東水流入稽徐當西南行不得逕向東南稽徐東北又隔南水并不得注合中水。龍編當作蠅漏卽句漏漢書地理志續書郡國志晉書地理志句字並加艸作苟。此加蠅作蠅字異而例同蠅字闕壞後人因改爲龍并改漏爲編。下注別有句漏在九真界中又胥浦之譌涇水。

出句漏山是卽瀾江其源脈躡委與陸平江全不相侔
此瀾字當亦同越史略作瀾元志附錄云北江路在羅
城東岸瀾江水分入北江瀾江分入北江之支水卽武
平水今所謂灘河瀾名本出晉世葉榆河注邪龍上流
已有盧倉禁水之目通典邊防門西戎吐蕃可跋海下
敘蘭倉水云東南流入蠻與蠻西二河合流而東號爲
濠鼻水又東南出會川爲瀾水焉西二河卽葉榆河濠
鼻水爲漢志自邪龍東出逕雙柏至來唯之僕水今雲
南雲州北之濠備江其流舊由蒙化廳西南馬耳坡麓
之濠溪江東出入定邊河合陽江轉東南合白崖河爲

禮社江下流爲河底江又名魯部河出保勝土司界爲紅江今潯溪江流斷明統志云大理府禮社江源自趙州白崖臉至楚雄合瀾滄江蒙化府陽江源出甸頭澗過定邊縣入瀾滄江定邊明屬楚雄兩江俱由此入瀾滄跡尙可見會川爲會州之誤本志戎州都督府諸蠻州下云會州西接匡州匡州治雲南縣會州在其東南卽楚雄之鎮南州南南安州西地瀘水由此流出下游自得通蒙瀘名瀘江正唐稱號寰宇記所采爲開元貞元諸錄之文元和志不應獨異疑蘇曆江三字本在慈廉水之上江下更有一名二字下條江上別有正名傳

本字皆闕失校者誤移其次蘇歷躋跡既定永順地位
斯可按圖準合越南地輿圖說小方壺齋輿地叢鈔本
存說去圖原書不可見集成圖無蘇歷江綫有西湖浪
泊注在東都方圍之左注文之右有一水綫上接富良
江綫迤西南轉迤東南至永昌州之次折東微偏南至
奉天府之次右合自南快州分支斜出東南之江綫此
卽泊江水徑蘇歷以涸塞不具奉天當次在永昌東北
而誤差南方輿紀要輿圖要覽安南圖亦有此注永昌
東北又增列廣府在東都方右江曲之次後說云安南
偽制卽交州爲東都附郭府曰奉天縣二曰廣德永昌

奉天既附在東都郭下東都方位不應差隔遠在西北廣德爲縣於圖標作廣府亦不合紀要本卷之附郭府三奉天廣德永昌永昌與廣德初皆爲府後遞降爲州與縣圖以奉天與二府分列爲三角形卽以通爲附郭之故集成圖無廣德其圖作在要覽所據舊圖之後時其府已降爲縣隸入奉天故依例刪去永昌尙爲州降縣似又在後越南地輿圖說云常信府界近中都屬縣皆沿官路平津廣邈無山林之限惟蘇江一流縈繞其間蘇歷繞舊清池上福而東二縣俱在江內永昌舊爲府似治清池後又由州降縣復似上福不能辨別其地

廣德今永順有越南地輿圖說永順舊廣德之文可憑
圖位應移置東都方圍之次東都應移近廣府圍次綴
奉天於其下舊以東都標占西徑三府分列東偏空位
及其南二隅因而舛亂越南北圻圖無縣目并無府名
水綫較舊圖爲備蘇厯首綫繪入其中圖不具經緯度
分以西南亞洲圖參校蓋起赤道北十八度至二十三
度英東百三度至百八度三十分河內準徑與亞細亞
東部圖相符蘇厯江綫自河內方位東曲引至北迤西
至折南處去首受之江河綫徑約十三分分法積六十
爲度度合飛鳥徑里數二百人行有曲徑較飛鳥徑差

長鄒氏伯奇學計一得王制九州說謂加三分之一有奇三分加一爲加作三百奇數無詳說今以諸圖距徑與舊籍里數審勘定爲二十圖沙河源尾兩徑分數已說具上此距徑十三分爲里六十九有奇除河內東徑去紅江二三里永順去蘇歷南曲止二十一二里故交趾去泊江不過六七里泊江流斷此圖綫經與北江綫亦差隔一二分綫南迤十三分許右側有一曲綫由西屈東南似卽舊圖永昌南之橫綫左端闕斷右末迤長至三十分舊兩圖俱爲失短情懷山河以此推合均在永昌之下游永昌宜爲舊烏延治所正綫自曲口下又

引至西南沙河口下十分許聯合懋河此渠舊圖所無
越南地輿圖說亦不敘及不審何時溝通綫上曲去懋
河口徑近三十分里數爲一百六十加永順距數踰百
八十分徑在山西位次之東北法蘭西人蔡尙質所繪
皇朝直省地輿全圖差在東南減十二三分越南三
圻考云富良江南道自山西迤東二十里之懋河東南
流懋河分支實在山西省治之東而偏近南其北尙爲
紅江正幹直省地輿圖徑較近彼圖河內準點去山西
止五十分山西距懋河口纔差十五分於越南三圻考
說不能純合河內經緯徑又差在赤道北二十一度七

分京師西十度四十五分與亞細亞東部復殊故今不以爲據山西治安山越南地輿圖說云古甯山卽嘉寧隋志嘉寧舊置興州新昌郡平陳郡廢十八年改曰峰州大業初州廢本志峰州承化郡下都督府武德四年以交趾郡之嘉寧置縣五嘉寧承化新昌高山珠緣元和志云嘉寧縣郭下承化縣東南至州五里承化近在嘉寧西北郭外今安山兼有其地城去永順依上數爲一百三十三四里於元和志百三十之數有贏治所或爲承化故縣峰州尙偏在東南五里州東南踰懸河入今慈廉西界爲故封溪東踰紅江至今白鶴東界卽太

平吳昌文自羅城趨唐阮二村至慈廉故城而止以下當由泊江口北渡太平在白鶴與嘉林之間張鏡心馭交記云永樂四年冬十月張輔至北江府新福縣謀知西平侯沐晟軍至白鶴遂移營於三帶州箇招市江口造船圖進取十二月晟奪宣江水上軍遂次洮江北岸輔亦遣陳旭往攻洮江議于上流濟師先遣朱榮以馬步軍于下流十八里泊舟筏爲必濟狀以誘之賊果爭渡登岸奪舟筏我兵奮擊大破之于嘉林江北留都督高士文督舟師于箇招市與朱榮與接十八里邱椿平定交南錄作八十里爲嘉林去箇招市程數箇招市去

白鶴不知若干里以去嘉林之徑推之當近太平白鶴
舊亦爲太平屬地後入峰州越南地輿圖說云使君城
在峰州今爲白鶴吳使君喬公年據此其城遺址尙存
喬公年越史略十二使君序目作矯公榘所據峰州時
已爲白鶴黎紀臥朝王元年改峰州爲太平府黎臥朝
元年去吳昌文南晉末年止四十二年太平時尙爲縣
府名改與之同知州地舊在所屬又白鶴越地有義嶺
越南地輿圖說云相傳涇陽王遷都於此本志太平舊
縣名義廉義嶺兼以爲名亦可證白鶴西卽安山所隸
府名國威阮紀英宗大定十七年冬十月有越國威行

宮及孔子祠之文高宗治平龍應三年三月下有國威
州元志附錄云國威州在羅城南明以前國威不治此
永樂時所置州有廣威無國威越南地輿圖說云山西
省陳時爲三帶廣威國威等路黎初因之光順中置國
威承宣統諸府縣及定版圖始稱山西繼復稱三江洪
順後專稱山西陳氏時之國威卽元志附錄之國威地
段與廣威及三帶俱不相接黎氏所置國威承宣後改
稱山西治所則在安朗卽陳氏之三帶今永祥府此國
威因山西徙入瀘南舊承宣名從之移入降置爲府安
山其郭下縣縣西有仙侶山越南地輿圖說云山在安

山縣仙侶社岑鬱蒼幽每春首迎會士女環集仙侶爲
縣中名山之一寰宇記云承化有可瀨山仙須山可瀨
不知今爲何山仙須審度字形當本作仙旅卽仙侶此
其確鑿可據者餘山有佛跡有柴沈皆名秀無名山甚
多連峰亘至美德道之美良界州名由此立美良沿山
四總皆蠻獠族居俗與安山殊異梁本紀云楊暕尅嘉
寧城李賁竄入獠洞獠洞卽在嘉寧界外陳紀作新昌
獠中新昌爲嘉寧南縣名隋志嘉寧下有新昌與交趾
俱不注某年置並梁陳舊縣新昌有獠洞治所當近美
良州南界甚長北界接羈縻南平州元和志入到下敘

其里數爲二百州境下云東西九十七里南北六十里六十當本作六百瀾江口界依寰宇記尙屬嘉寧越南北圻圖徑去省治已四十七分加新昌界百數十里是爲四千方輿紀要以州城爲太原府西北誤指南平西北之平原都金等州爲此州越南地輿圖說敘入山西亦不能確指爲安山又增綴福祿一州福祿爲下記之唐林在中圻之河靜省內與山西隔數省亦不知如何牽入州東西止九十七里東界有封溪占四五十里西界差亦不多又經南田百三十里至恩樓縣南田似州西北之驛名恩樓出界外元和志附貢州有武定云東

至府三百二十里管縣二扶耶潭湍武定見本志安南
都護府所屬諸蠻州標列有二一爲福祿所改安武之
誤文屬縣有福祿柔遠唐林一是此州縣名全闕恩樓
無別見疑卽潭湍之舊名在扶耶東六十里其地今屬
扶寧縣越南地輿圖說云永祥一府五縣惟扶寧獨在
瀘江之右扶寧與安山同岸略偏西北故城去縣遠近
無詳細文可校晉志新昌郡屬縣有西道寰宇記敘峰
州至古湧步水路首西道江西道亦卽此越南北圻圖
山西左右徑甚狹今移藤河首綫差東南十二三分扶
寧去西北沱江口度亦不過八九分乃水行四十里至

忠城州水行謂山紅江渡至沱江口西北岸忠城州爲
沱江口三歧巡所之舊州越南地輿圖說云西安府在
興化之西南沱江二江皆自內地發源沱江經水尾州
至鎮安縣沱江經西安府至青州縣會流於柴巡所轉
下山西夏華而至山岐山岐卽三歧以沱江與紅江三
水合流得名方輿紀要引羅洪先增補廣輿圖云白鶴
神廟三歧江四日至白鶴縣三歧巡所在舊白鶴神廟
去白鶴四日程程五十里四日爲一百里白鶴近藤河
口偏東數里此州去三歧巡所不遠忠城當作忠誠本
志諸蠻州有甘棠下云縣一忠誠忠誠初自爲州後改

屬甘棠降而爲縣又二百里至多利州又三百里至朱
貴州又四百里至丹棠州皆生獠也又四百五十里至
古湧步水路距安南凡千五百五十里多利以下皆陸
行水路敘別一道里數今多糾誤西南亞洲圖沱江口
西北去臨安府灞洒汛魯部河界點止兩度三十分亞
細亞東部圖無沱江及洮江諸綫河內點徑去紅河上
游界點爲三度三十分減去沱江口以下一度四五分
較西南亞洲圖尤縮越南北圻圖紅江上游標作黑旗
地方黑旗界首卽灞洒汛沱江口去首界亦近兩度三
十分加曲徑贏三度三圖參互不同美利堅人江戴德

地理志略中國南十省圖盤龍江口去梨花江界正三
度梨花江東亘有一水綫下流亦合盤龍江此卽洮江
所首受之三岔河距徑亦同盤龍江爲馭交記之宣光
江元志附錄目爲宣化江黎山則安南志略作宣化水
爲三帶江之一今省稱瀧江其江本合入洮江越南三
圻考云洮江又名清河發源於雲南由開化之蓮花灘
入北圻歷興化北境東會瀧江經宣光而南入富良江
其匯流處卽越治關也越治關近三歧巡洮江入紅江
上流先已合瀧江瀧江下口卽洮江口亦卽沱江口江
綫雖不具曲徑距徑展長實與越南北圻圖同越南北

圻圖宣光江下流分作兩綫一綫於興化東北紅江曲
中聯入一引至山西東北始合山西東北之綫似近世
溝通別渠非其正幹西南亞洲圖開化南江徑祇有沱
江口北一綫無迤東之綫魯部河界點以爲南昆嵒位
次所占減短半度亞細亞東部圖界點緯徑在赤道北
二十二度四十五分地位無差江綫有曲東曲南兩徑
無曲西曲北徑故復短至三十四五分合校四圖最長
之徑至三度爲止以上無別據三度計里數惟九百六
十不能及千較此文差短至三分之一有奇陸路有南
北二道增補廣輿圖云一道山臨安府蒙自縣經蓮花

灘入交州之石隴關下程瀾峒循洮江右岸四日至水尾州又八日至文盤州又五日至鎮安縣又五日至下華縣又三日至清波縣又三日至臨洮府洮水卽富良江上流其北爲宣光江南爲沱江所謂三江者也臨洮二日至山圍縣又二日至興化府自興化一日至白鶴神廟三歧江其一道自蒙自縣河陽隘循洮江左岸十一日至平源州又五日至福安縣又一日至宣江府又二日至端雄府又五日亦至白鶴三歧江兩道雖俱以洮江標別中間實差隔四水洮江與紅江正榦之富良馭交記本分析爲二平定交南錄併合爲一通名洮江下

流始目爲富良安南志略富良作歸化洮江割出入宣
化元志改宣化爲宣光明統志分其上下流爲二云宣
光江在宣化府曠縣源自雲南教化長官司入境流七
百餘里以達宣化江宣化別爲一江名是以納入之洮
江爲宣化要覽圖注富良江名於洮江下口方輿紀要
本條引海南使錄云富良江行四十四里謂歸化與洮
江相距之數二江名雖移亂其條別尙未有混越南地
輿圖說從平定交南錄通稱洮江永祥府下云洮江上
游自興化鎮直安樂過山圍至我匹鶴又一派注江上
流直興化青州縣經過山圍合流與西安府下所敘地

段不一亦以一爲洮江本幹一爲紅江之餘洮江流斷
已久平定交南錄云西平侯自蒙自縣進兵經野蒲蠻
入境都指揮朱濬等奪猛烈關俞讓等拔柵華隘隨處
築堡駐兵伐木造舟都指揮徐源孔斌等突出宣光江
口奪其澳泐等沙左參將豐城侯領兵渡其上游都督
程達等中夜舁舟越山自間道以出洮水江縱火焚賊
舟遂奪富良江沐晟造舟已在宣光江畔舁舟越山爲
越端雄所治山陽縣之南山洮江在此山南麓上流舟
不能行躡跡罕有知其曲折者故越南北圻圖無此綫
西南亞洲圖綫徑起開化南四十分亦不知爲宣光江

抑爲此水右道由程瀾洞循洮江右岸卽循紅江右岸
江南要覽圖又有一江由老撾流入不注其名方輿紀
要歸化州下云漆馬江在水尾州西南自老撾司境流
入東北合於洮江所圖卽其江漆馬今不知別爲何名
鎮安清波圖俱列在此江之南夏華又別列在此江所
納小水之南去洮江本岸皆遠左道自河陽隘循洮江
左岸爲循三岔河下流清水河之左岸其地經平源州
亦繞出宣光江口合別水之左岸並非近傍本江東北
岸以行里數與江均不能比合右道三十三程較此記
里數差多三百左道減十程又差少二百以上下文相

涉移誤之迹推之左道近是宣光以上又有師氏範滇
繫征安南紀略所述雲南提督烏大經置立馬白關外
臺站檔記之文地形條列尤備站起關外之達號寨至
安邊接河陽界徐氏越南道路略云安邊五里至河陽
河陽差在安邊南五里記言清水河六十里至安邊過
渡七十里至富靈社富靈社七十里至泐冲泐冲八十
里至泐巧泐巧八十里至平衡平衡八十里至廊嶺廊
嶺八十里至大蠻州過賀良社賀良社六十里至賀良
下畔賀良下畔至福安縣亢律八十里亢律過大河至
雄異總上畔七十里雄異總上畔至下畔七十里下畔

至宣化鎮八十里安邊至宣光省治爲八百二十里減去河陽以上五里較羅說差多十五里後文敘都數云自安邊至大蠻州四百五十里大蠻州至宣光三百六十里大蠻州上減少十里則止差五里大數相若多利去忠誠二百里地在端雄東南五十里要覽圖端雄南有收物州在洮江南其東又有淵象縣二地里數俱近不知孰爲舊州治所明統治有收物爲宣化府屬縣淵象蓋後分置洮江於縣東合宣光江淵與澳形近物與物聲亦相近此宜卽平定交南錄之澳物等沙時舊州已廢依江邊地稱今縣興州亦皆省入山陽朱貴當北

出之道必福安三當作二明統志宣化郭下爲曠縣文
安次在當道之下平源之上卽此縣今名恆安附安平
府郭下宣光治此元志附錄有光州又有恍縣光州注
云一云明蘇卽明宣光黎氏承政改名明光明字由之
出恍縣卽曠縣不隸光州郭下州治似本與今同爲朱
貴故治朱貴與多利皆羈縻州本志俱無所見越南地
輿圖說云宣光省唐爲陽州陽州亦無其文下州有湯
州爲下文之湯泉州地段不相接都金州下云縣四温
泉嘉陵甘陽都金平原州下又云開成四年析都金州
之平原館置都金近平源温泉爲朱志西平太守所領

五縣之温江甘陽都金宜卽分都陽置立陽州疑本作
都陽州爲都金之異名越南地輿圖說所據舊文脫一
字都陽舊屬西平其郡治西平縣當在都陽之南都金
下別有西平與南平連次朱貴在南平西北或是西平
本志州名襍取舊錄綴列朱貴蓋貞元中所改之名多
利不知何州武寧州下云縣三文葛甘郎蘇物蘇物音
近收物武寧似卽此州元和志云峰州秦象郡之地漢
平南越置交趾郡之蘆泠縣地蘆泠地甚廣東沿瀘江
北岸亘至陸州之烏雷海口西跨西道江兼有多利不
止峰州數縣之境漢志云益州郡來唯勞水出徼外東

至糜伶入南海過郡三行三千五百六十里牂柯郡西
隨糜水西受徼外東至糜伶入尙龍谿過郡二行千一
百六里都夢壺水東南入尙龍谿過郡二行千一百六
十里糜伶卽麓冷其界東至海西至尙龍谿敘列甚明
來唯爲勞水首受僕水之處越雋郡青蛉下云僕水出
徼外東南至來唯入勞過郡二行千八百八十里僕水
爲漾備江上流之瀾滄江來唯錢氏帖新註云應今
開化府西地此僕水爲其下流瀾泗汎之魯部河勞水
出徼外爲保勝之紅江上流卽魯部河入字當本作爲
爲勞與隴西郡氏道養水下云爲漢一例至糜伶入南

海爲由清關出三歧口注灘河達太平江至廣安之阿
龍灣漢口入海過郡三謂過益州交趾及牂柯牂柯之
進桑錯入糜伶西界行三千五百六十里三亦當作二
漢里小於今里十分之三二千五百六十里減實止千
七百九十二里卽英東百三度至百八度三十分之徑
數僕水行千八百八十里千上當有三字齊氏召南水
道提綱敘大廠河源流云千八百里加入潯溪江以上
九百數十里得此數兩水實一新斟注以徼外勞水爲
普洱縣之李仙江陳氏澧水道圖說又以來唯僕水爲
車里土司之九龍江地形皆不合李仙江出界逕孟臘

土司爲黑河入興化境爲沱江口地去瀟洒汎甚遠九龍江由暹羅北境經老撾土司至東埔寨爲湄公江乃九真郡下所云有小水五十二并行八千五百六十里者爲僕水分出之別支非卽僕水其流亦自入海並不合紅江今悉不取糜水壺水並宣光江上源之水新對注謂壺水似開化府之烏期河水道圖說改作寶寧縣之普梅河二河皆南流烏期微偏東普梅迤向西合爲龍江越南地輿圖說云安州府屬山川皆自內地發源普江自關化經大蠻州至福安縣強江上流湊合通至我巴弩爲三歧巡普江卽烏期強江爲普梅水道圖說

以普梅當壺水烏期應折出以當糜水又從新斟注說
釋糜水爲大廠河西隨地入益州之西豈云可通水經
有糜水與僕水並次在葉榆河下僕水文全佚今止存
過不韋縣四字糜水首句亦闕贖存東南兩字下云出
益州界入牂柯郡西隨縣北爲西隨水又東出進桑關
過交趾蘆冷縣北分爲五水絡交趾郡中至南界復合
爲三水東入海文尙完備其水出益州界知志文西受
徽外本作西受律咎律咎卽律高爲益州屬縣葉榆河
注云盤水出律高縣東南監町山東逕梁水郡北賁古
縣南梁水東晉分賁古與西隨兩縣地置常璩華陽國

志南中志云梁水郡刺史王遜分置在興古之盤南梁
水縣郡治賁古縣西隨縣盤南水經溫水篇校注引舊
本作監南謂監町山南山屬律高是郡與其縣接界賁
古宋齊志並作新豐其分出縣又有建安建安近元志
之建水州今建水縣新豐必蒙自賁古在郡西不在郡
北南字當作東律高似治今開化北之邱北縣監町山
爲三板橋土經歷東之鳳皇山盤水爲馬別河梁水卽
廉水以水上有天生橋三水從橋下伏而復出兼得梁
名郡治卽文山縣西隨州安縣廉水爲馬期形甚明
白東出進藥關東兼南面進藥關南界卽廉伶西地注

云進桑縣牂柯之南部都尉治也水上有關故曰進桑
關也關在今越治之北要覽圖收物西有鎮關爲洮江
上之關古時關置淵象之東當宣光江口進桑有縣水
經止言關縣當在關西其地跨洮江南北故爲勞水過
郡所及東至糜伶入尙龍谿卽入淵象北之洮江尙龍
谿源委應別有正文綴在進桑下今關行千一百六里
爲行今里七百七十四有奇與明統志流七百餘里之
說正合葉榆河注云自西隨至交趾崇山接險水路三
千里三千亦當作二千崇山接險是達號寨南箐口至
廊嶺之形二千當今千四百以尙龍谿以下多利至龍

編東南交州故城里數五百五十九加入本徑七百七十四爲千三百三十三宋平以下尙有逸向東曲之徑較陸路差長再加入十餘大數亦近普梅河西南行壺水下東字當衍其流先於端雄上游與瀧江會合通言入尙龍谿意以二水爲東西二源不分正幹與支水行千一百六十里十字亦當衍烏期流長上游有三伏口除去達號寨天生橋以上之徑里數得齊同都夢晉志作都詹卽宋志之都陽其縣後割入西平似寶寧南蘇婁卡界外之舊保樂州今潞安州非卽寶寧懷寧有西洋江爲銅瀨之迷水其地尙屬銅瀨保樂州界與廣西

之小鎮安廳錯接都夢屬牂柯由銅瀨東南之鐔封句
町通入宣化見越史略阮紀太宗天感聖武四年置望
國鎮及歸德保康七驛下宋時已置州入元爲路明改
府領有九縣地於西漢實止爲都夢及進桑兩縣所轄
進桑後升爲王國東漢復廢爲縣更名進乘三國蜀時
與都夢並割隸興古縣境未有移易晉志增出漢興據
葉榆河注其縣在盤水下流似卽分律高之東地置立
此無省析南中志都詹作都唐云故名都夢綴在興古
縣末進乘剛出在外西平下云刺史王暹時曩量保盤
南遜出軍攻討不能克及暹薨後寇掠州下吏民患之

刺史尹奉重募徼外夷刺殺量而誘降李邊盤南平乃
割興古雲南之盤江南如南零三縣爲郡其下文闕盤
南卽梁水條下之監南盤爲監誤雲南依文義亦當作
監南盤江當作溫江與南如南零皆前志所無爲分進
乘改置宋志別云西平太守晉懷帝永嘉五年寧州刺
史王遜分興古之東立何志晉成帝立非也永初郡圍
何志並有西寧縣何云晉成帝立今無領縣五西平合
溫江令都陽令晉綏長義成長其下並云何志晉成帝
立末綴案語云此五縣當與郡俱立王遜置西平與南
中志說不同郡地在興古東又非進乘何承天舊志以

爲成帝立於尹奉時代爲近縣名惟温江可合餘皆改
別復有後增本志戎州都督府所屬諸蠻下有盤州本
西平州武德四年置貞觀八年更名故興古郡地其南
交州縣三附唐平夷盤水彼西平治今平彝縣東貴州
之普安廳在橋水南不在盤南故興古郡地其南交州
卽衍朱治之說興古郡地謂宛温交州標著唐界晉地
差隔甚遠兩西平參合四說似皆晉分興古所置王羅
首分立梁水此郡必亦爲其所創時進乘地沒於變量
太守不能至郡僑治宛温尹奉平盤南始移郡治入温
江更於旁地分設二縣尋又爲李勢所陷咸康中寧州

反正乃別立郡治於温江與南如之閒并改南如爲西
寧又分南寧爲晉綏義成宋志偏據其一致與何志相
乖都陽有壺水流跡可據不能移北進乘又明白割出
所改之縣豈得無著西平本治自爲此朱貴舊州之西
平今府名爲安平於舊名尙近西寧後亦見南齊志卽
武寧之名所從出隋志無此郡蓋梁後罷廢越史略阮
紀尙有武寧又有都金平源惟西平無別見明已改爲
宣化元志附錄縣名亦有武寧不知卽今山陽抑別一
縣丹棠卽大蠻州今爲木州四百亦當作三百四字涉
下而誤今臺站數廩千古里差長木州接安寧爲舊平

源丹棠卽都金都金治溫泉爲晉宋溫江南齊志之暖
江木州上游臺站記有南溫河在箐口下三十里爲籠
江所合之支水以下得通蒙溫名溫泉外有嘉陵及甘
陽又有都金此都金爲舊都陽在昔江東故州地迺至
潞安境亦甚廣古湧步依臺站記後數卽安邊在清水
河西岸本志有古湧縣屬卽茫州卽茫州治卽茫縣安
邊要覽圖不列其目河陽隘北少西有芳渡村注在界
縷之外越南地輿圖說云渭川聚龍二十四處芳渡諸
隘乃財貨所聚之地芳渡今入彼界乾隆一統志外藩
安南建置沿革下載康熙三十六年雲南巡撫石文晟

奏言牛馬蝴蝶圖明時內屬自我 朝開闢雲南卽在
蒙自縣征糧安南國王以爲彼地被土司所據請給還
又載雍正中總督高其倬奏開化府馬伯汎外四十里
至鉛廠山下小河內有逢春里六寨冊載秋糧十二石
畧於康熙二十二年入于交趾雲南通志自開化府文
山縣南二百四十里至賭呪河與交趾爲界今自開化
府南現在之馬伯汎止有一百二十里卽至鉛廠山下
小河亦止一百六十里是鉛廠山下小河以外亦有八
十里係雲南舊境雖失在明朝但封疆所係請一併清
查蒙自文山兩縣界地明季墜 國朝多爲其所占

芳渡蓋亦於康熙中由土司割出其地屬渭川河陽及
安邊必同爲渭川屬地古湧爲安邊耶茫似卽渭川蔡
沈書集傳禹貢九州及今州郡圖有耶茫綴在龍武之
東龍武西瀕東洱河其南有一水纒由耶茫迤西南聯
入東洱東洱下經林西德化二州之南斜至峰州林西
西北接耶茫耶茫與德化據本志皆永泰二年以林覲
將部落置林西別次在後則非由二州分立南蠻傳南
詔下云安南桃林人者居林西原七綰洞首領李由獨
主之歲歲戍邊李琢之在安南也奏罷防冬六千人謂
由獨可當一面邊蠻之入蠻酋以女妻由獨七綰洞舉

附蠻李琢舊傳作李涿下云罷防兵李由獨勢孤拓東節度誘而臣之安南始有蠻患林西接南詔界當在耶茫西北耶茫聯近德化兩注蓋傳寫倒誤林西與龍武俱在蒙自界內耶茫在德化西疑亦入安平界方輿紀要蒙自縣下引陸氏滇紀云自老寨霧露結箐灑哈諸地至八寨又進至江底其傍曰猛撒箐渡江卽交趾界又云縣有溪楮山去八寨二十里又南至大江地名安邊老寨在楊柳河關之南八寨近江底東出至溪楮山地

地在兩路之中乾隆統志無溪楮山有八寨綴在開化古蹟下云阿雅城明土司龍上登築卽今入寨尙有遺

址溪楮山疑與芳渡諸隘並夷入越界八寨尙在界中
阿雅爲明土司所築舊城乾隆統志又云阿雅又名謹
耳卽強現部別名強現蠻省讀可爲強蠻音近郎茫或
其州本治此德化入滑川書集傳圖水綫多移失地位
亦頗改亂原本似出賈氏之國要圖藝文志有賈耽地
圖十卷宋志作國要圖一卷方志圖二卷餘七卷時已
亡佚此圖多唐地名蓋約國要圖爲之圖本累帙成卷
其中必有總有分標注詳細此約爲一幅文多刪闕故
名不完備洱河分爲東西二支西支入文單國此爲今
老撾幾麻刺諸部之瀾滄江唐以前書惟溫水注有其

說云自乾德通頰口水源從西北遠荒運寧州界來也
餘無別見南蠻傳敘水陸兩眞臘亦止言北多山阜號
陸眞臘半南際海饒陂澤號水眞臘半不知其國俱在
洱河下流此圖非曾見當時鴻臚所譯從邊州入四夷
之道里向至山川躡絡者不能爲河上流爲洱湖洱湖
東有鄯闡二字鄯闡東注滇池滇池南有一水綫由河
分出迤東北引至柘東城西之雲南山南而止鄯闡卽
柘東之別名滇池當綴在柘東城東昆池之次水綫卽
東洱之首綫應引至昆池之東南與龍武西之河線聯
接皆翻本鉤舛注文亦以避繁密就空位而失以此推

校不獨耶茫當移聯德化其西南一水綫亦應移置本位引過德化至峰州西南合入東洱今形相反易此綫卽古湧水徑於龍武無涉並當釐正圖有耶茫水綫又有德化地位雖殘闕彌可寶貴古湧有縣有步元志附錄尙存縣名安邊河陽皆明世改目越南世系沿革略云同治九年黃崇英遁入保樂州白苗界內復踞河陽光緒元年保樂州土民及白苗皆降服趙沃督諸軍進攻遂克河陽河陽爲大名安邊爲小名河陽宜是古湧縣治安邊其步地臺站記安邊去白馬關細數二百八十里都數作二百九十乾隆統志云開化府南至交趾

界二百四十里西南至交趾界四百一十里南徑二百四十據舊賭呪河界而言今減短百二十去西南界爲二百九十與臺站記後數合一賭呪河今易名南溫去馬白關里數臺站記減作百十是以前數差十南溫河北達號寨小河今亦名賭呪其河去關止二十里尙在鉛廠山下之小河以內非舊賭呪水道提綱敘開化府河流至第三天生橋伏入復出云有賭呪河西自山中東南流會而俱伏故湧出水益壯又東南百八十里南入安南國界水道提綱所云賭呪河卽遠號寨河去舊賭呪惟置界徑又差多八十較明界復加長李氏北

搭一統輿地全圖胡文忠一統輿圖府南界徑俱同統
志卷首所列舊圖李氏圖賭呢河縮入界點以內半方
徑有奇文忠圖移近界綫安平方位一併移南未詳所
據直省地輿圖安平準點去府三十三分有奇似本文
忠圖點石齋所摹法人繪印之越南全境地輿圖府方
位去界綫止占方徑十分之八其圖亦無經緯準度方
各百五十里八分正百二十安平不得移出界外然所
擬馬白關準點亦在今賭呢河次與達號寨爲一俱不
準密今以統志安南建置沿革所敘文山縣南界至及
本府西南界至兩說爲定水路距安南凡千五百五十

里五百增多陸徑二百寰宇記交州四至八到下云西
至姚州水路約二千里姚州謂八平城西州東南之界
姚州四至下云西南至南詔所居羊苴咩城三百里自
羊苴咩城西至永昌故城東南至安南府水路約有二
千里羊苴咩城水路謂由洱海達濠備江轉入瀾溪江
至大廠河下流之河底江由乍甸河出倘甸河卽八平
城界乾隆統志云乍甸河在蒙自縣西北七十里源出
建水縣之判文山東南流入縣境下流匯於梨花江又
縣北七十里有倘甸河發源木馬沖亦流入梨花江水
道提綱云河底江經六達寨北又東數十里折東南流

百數十里有一水北自納樓長官司合二溪東南流又合東北一水南流來會納樓司水卽乍甸河所合東北水爲倘甸河流跡俱明確倘甸卽八平鄰地之儻遲頓八平界在此儻遲頓去古湧步里數四百二十八加入上數千五百五十爲千九百七十八大數正二千竄字記所據此記舊文已然五百字非有誤峰州四至八到下云西北沿西道江至古湧步約八十里至八平城約一千三百里至桃州二千里其文亦約此而譌舛不可讀審覈此文一千三百二十里爲自峰州至古湧步之數約一千三百里六字當本在古湧步下百下又脫二

十兩字約八十里四字應次在八平城下原作約四百
二十八里今脫四百二三字十八兩字又誤倒至桃州
二千里以交州文推校當作至姚州二十里蓋八平尙
在安南界中迤西二十里許始爲姚州東南水步之界
故復補綴其遺一千三百有正文可憑此道爲陸路沿
西道江謂沿忠誠江岸兩徑長短互備元和志交州八
到下云西北至姚州水陸相兼未有里末有二字不成
詞義詳勘字形當作千八百三字千與八合併爲未百
譌作有形俱未減所綴亦陸路云水相兼水謂宋平至
忠誠三百里諸數並著根實水徑與陸差至二百水道

當爲紅江非洮江增補廣輿圖洮江右岸陸路里數爲千六百五十此減少一百較率爲近安邊北去渭川陌心河別名之清水河六十里東瀕三岔河下流之清水河渡方輿紀要云梨花江東南流入交趾界合於清水江清水江卽清水河河流過河陽隘本合入紅江下流又復分支爲洮江要覽與集成兩圖洮江上流俱失繪聯續中國南十省圖三岔河出界亦迤東南行不引合紅江直省地輿圖蒙自東水出界十五分卽合入河底江綫合處爲老開有圈徑置在兩綫之中其東二十分許又有一水綫首受安平南界外之陌心河綫折向東

南至宣光南合瀧江綫此爲洮江之正綫折處當更有
運西一綫與老開東綫相聯今川流斷闕繪越南全境
地輿圖三岔河作白期河下流亦合入紅江惟地段與
直省地輿圖不同此圖合口在界綫外一方徑二分較
彼徑差長過半口上六分爲猛古下五分始爲老開老
開猛古之間爲新開新開東九分爲洮江首綫上無別
源老開卽保勝其地段甚長上下游得通稱猛古或亦
其中土司部落之一名安邊當在猛古東北清水河於
猛古老開之間流合紅江紅江水道可通入安邊古漢
步仍爲洮江之步紅江上游多灘石舟行避險洮江古

稱尙龍谿本不成川雨集水盈澗則立絕故其道如此
葉榆河注云馬援言從菴泠水道出進桑王國至益州
賁古縣轉輸通利馬援所行亦糜伶勞水轉入尙龍谿
上游之賁古水口進桑國地卽勞水所過之牂柯郡地
不然進桑北谿旣非軍輸利運所資南川亦迺入來唯
不旁涉支渠如何直指賁古證以此記渠脈益明賁古
在林西龍武之北此至古湧而止三益河上流似已流
壅今安邊水道亦罕有行者范氏本禮富良江源流考
云法人流至於同治四年由滇入越循紅河以探遠境
魯部河順流而下紅河至河內流丕所行爲保勝之道

元史張立道傳云爲大理勸農使使交趾並黑水以至其國大理黑水卽寰宇記之羊苴畔城水下流由八平西界並至其國由魯部河達紅江於此道皆不純同某氏黑河紀略有法兵總伯那堅於一千八百八十八年前往黑河及紅河青河等處游歷之文青河卽清河可附合於三岔而其河與紅江及把邊江下流之黑江分配爲三則爲洮江下游及所合宣光江之大名非此清河越南三圻考言清河由開化之蓮花灘入北圻歷興化北境北圻兼該渭川邊界興化北境謂腹地其入紅江口地在猛古之下抑在其上無別據不能更校里徑

長至千五百五十與越南北圻中國南十省兩圖距度
差數甚懸盤龍江徑自界綫至合洮江口中國南十省
圖亦止一度三十分與漢志糜水行千一百六里之說
差三分之一有奇越南北圻圖加入曲徑亦不能贏十
分所差仍近三分之一今兩存其疑元志建水州古稱
步頭步頭之名實出古湧南蠻傳驃下敘東爨烏蠻部
地云自彌鹿升麻二川南至步頭升麻爲戎州都督府
屬之南寧州縣名彌鹿本志無文元志廣西路下云東
爨烏蠻彌鹿等部所居彌鹿部地在今廣西州升麻黨
亦在州屬之師宗彌勒兩縣境中自此南山爲阿迷州

及蒙自文山步頭正指安邊方輿紀要云天寶九載鮮于仲通伐南詔統大軍出南溪路分遣越楊軍出會同路安南軍出步頭路步頭路亦是古湧注以爲今臨安府從元志說不盡符古又百八十里經浮動山天井山上夾道皆天井間不容跬者三十里浮動卽八寨西北老寨楊柳河關間山天井其支名方輿紀要云楊柳河關在蒙自縣西南近王弄山長官司山高箐深有險可恃乾隆統志作阿得山云在文山縣西南二百里府志盤旋無際古木幽深杳無人跡惟見雲飛霧繞莫測其中所有盤旋無際謂上山之層關道在其麓瀨楊柳

河今名新現在三岔西山北谷有石城乾隆統志云石城在新現阿打克山嶺府志山下有井旁有石碑字跡磨滅不可辨識城中確磨軍器諸物人或取之卽中毒其城四面石壁惟一徑可通不知何時所創阿打克卽阿得語有繁簡其嶺亦名風魔壹統輿圖風魔嶺在阿得山北距文山一方徑又八分之三圖方徑近百六十里距數爲二百二十舉成數得云二百阿得山在嶺南半方許此阿得幹首之山非乾隆統志所綴之阿打克山李氏圖三岔河西山皆層接二山本一幹因得通名壹統圖嶺去河口界線已近一方十分之一安邊去界

度不過數里浮動爲阿得大榦之名天井卽石城峽間
不容跬者三十里三十當作三四曹氏樹翹滇南雜志
石城下有紫竹繁茂人不敢伐沿路石街迤邐到城內
云云石城外有石街街旁紫竹成林地形尙寬坦非間
不容跬石壁近在城下街左右亦非通爲天井三四里
專據城徑而言二日行至湯泉州二字亦當作半半日
爲二十五里其地去山近出谷一徑可至不必頓宿故
順文義言半日行若二日當踰宿無別義可取應同上
下文通言又百里不得遠附耀州以南之例雜以日記
湯泉州去石城二十五里似卽舊王弄司地明統志云

司在臨安府東南二百五十里元爲大小二部洪武中
改長官司司去納樓七十里去蒙自百十里治所當在
此湯泉州卽湯州本志云湯州湯泉郡下唐以故秦象
郡地置土貢金縣三湯泉綠水羅韶元和志此州不列
朝貢舊亦入羈縻御覽州郡部引方輿志云湯州或爲
湯泉州湯泉爲舊名秦象郡漢元鳳中罷入鬱林牂柯
此州近賁古亦接西隨得通爲象郡地方輿紀要謂在
諒江府東因舊志湯泉作溫泉牽入温州而誤溫泉滇
與越兩界中皆在所有明統志云溫泉在臨安府治西
水如湯每春暮郡人浴三日乃歸謂之祛時疫三州四

縣俱有之乾隆統志云寧州阿迷州河西蒙自等縣各
有溫泉王弄山多龍潭其水亦有溫熱如湯者爲土人
祛疫所資故同此目金產亦蒙自境中所有明統志臨
安府土產首金云安南長官司出安南司在府城東南
百九十里去王弄六十里其治在鑽天青河北西南界
迤至納更方輿紀要云明天啟二年烏撒安效良引兵
入霑益抵交崗犯安南長官司竜古哨土官沙源擊走
之竜古哨今新現河源之龍樹村地村南少西壹統圖
有金釵廠爲舊礦戶所置湯泉屬縣有三西南境廣得
踰河亘至此廠又五十里至祿索州祿索州當卽綠水

縣緣與緣形近索州二字不知傳寫有誤抑其名亦經
改易州與縣復有升降又十五里至龍武州龍武卽帝
古本志龍武下云大厓中以潘歸國部落置縣二龍邱
福宇龍武置在湯泉之後蓋本湯泉之羈縻部地後分
立爲州壹統圖龍樹去嶺半方又八之一爲里九十與
龍武去天井徑正同皆爨蠻安南境也謂古湧以下皆
嶺南之爨蠻部地隸入安南依寰宇記八平城界此文
當本在儻暹頓下與八平城連屬今本誤倒又八十三
里至儻暹頓儻暹頓已說具上滇南雜志云倘甸在蒙
自縣西七十里昔名童柴冲鄰撫軍平寇之後始闢草

萊立城名倘甸鄒撫軍謂明巡撫鄒應龍儻遲頓入明
已廢爲荒村名童柴沖鄒應龍始改爲儻甸實則童柴
卽蠻語之儻遲遲與柴聲近儻讀如堂轉別爲童童柴
與儻遲乃譯異非名異鄒應龍惟刪遲字改沖與頓爲
甸其地自爲古所開通並非新闢乾隆統志云儻甸在
納樓茶甸東道通蒙自縣爲邊要地明天啟二年增設
守備於此儻甸地當衝要壹統志圖無儻甸止有儻甸
河自木馬沖迤東至雞街北合街東之雞街河北出爲
清水河雞街河源出雞街西南乍甸河東實爲故儻甸
河之斷渠雞街並不在此方輿紀要云雞街寨在縣西

北道出府城此爲要口雞街有寨當蒙自入府之孔道
在儻甸北瀕清水河其河卽清水圖所繪似儻甸河改
流之迹雞街因河流移失其次地位在木馬沖東河曲
中必童柴沖注文當作儻甸徑去龍樹半方微贏卽八
十三里雞街寨蓋八平城儻遲頓在安南界口不知屬
何州禹貢九州及今州郡圖龍武東微北有林西疑卽
林西之七綰洞地時防冬兵所戍爲此隘安南境謂峰
州都督府之羈縻州地元和志云安南都護府管羈縻
州三十二峰州兼管二十八驩州六峰與驩二州都督
分領安南管地一得二十八一止於六兩數通爲三十

四二字爲誤峰州所兼管之二十八州卽在本管三十四州之中寰宇記峰州界與安南界同以姚州爲限此安南境自兼峰州分地而言本志三十四州據元和後續置及其先所置而廢改之舊州增益爲四十二後標右隸安南都護府最目其下又別出蜀巽蠻州十八一條注云貞元七年領州名逸後別標作右隸峰州都督府峰州所領之巽蠻州與安南之羈縻州析別爲二州數十八與二十八旣多寡不同巽蠻上加蜀字又非卽林西龍武諸州之地南蠻傳云兩巽蠻自曲州靖州西南昆川曲輓晉寧喻獻安寧距龍和城通謂之西巽白

蠻自彌鹿升麻二川南至步頭謂之東蠻烏蠻西蠻自言本安邑人七世祖晉南寧太守中國亂遂王蠻中梁元帝時有爨瓚者據其地既死子震翫分統其眾隋開皇初遣使朝貢未幾叛文帝誅之諸子復爲奴高祖卽位以其子宏達爲昆州刺史爨宏達既死爨歸王爲南寧州都督居石城襲殺東爨首領蓋聘及子蓋啟徙其範川有兩爨大鬼主崇道者與弟日進日用居安寧城左開章仇兼瓊開步頭路築安寧城郡蠻震騷其殺築城使者元宗詔蒙歸義討之歸王及崇道兄弟千餘人泥首謝舉赦之俄而崇道殺日進及歸王歸王妻阿姪

烏蠻女也走父部乞兵相仇於是諸爨亂闔羅鳳立遣
昆川城使楊牟利以兵脅西爨徙戶二十餘萬於永昌
城東爨以言語不通多散依林谷得不徙自曲靖州石
城升麻昆川南至龍和皆殘於兵烏蠻種復振徙居西
爨故地與峰州爲鄰貞元中置都督府領羈縻州十八
依此說十八州卽舊戎州管內之曲靖等州因州名後
有改易數亦減闕止存三分之一故別綴此條後文又
云安南有生蠻林靚符部落大厓中置德化州戶一萬
又以潘歸國部落置龍武州戶千五百詔安南節度使
綏定之貞元七年始以驩峰二州爲都督府驩在安南

限重海與文單占婆接峰統羈糜州十八與蜀巒蠻接
龍武改附德化隸入生蠻與此記比合湯泉祿索折出
生獠界外不同驩州置都督亦非始於貞元竄宇記云
驩州隋置後爲日南郡武德五年置南德州總管府貞
觀初改爲驩州又改爲賓州二年置驩州都督府驩州
都督置於貞觀二年峰州爲安南右障當亦如本志說
卽爲武德四年立州時所置貞元十八州自爲續增峰
州至儻遲頓中間依此記所列州名除湯泉入下州祿
索疑爲其屬縣之緣水餘忠誠多利朱貴丹棠并龍武
已有五州加入恩樓古湧所隸之武定郎茫二州暨禹

貢九州及今州郡圖與郎茫龍武並列之德化及林西
二州通爲九州此皆都督舊所兼管之州後置之十八
州界由之接若謂諸州皆本屬都護峰州西北無屬地
可通十八州如何遙隸且所領旣以爲西爨故地又言
與蜀爨蠻接蜀爨與本爨復分爲二於本志所標之日
亦歧其說由牽衍而失又東爨界舊由升麻彌鹿二川
南至步頭地段本與峰州相錯十八州中疑亦尙有舊
州爨蠻當如本說又經八平城八十里至洞澡水八平
已出峰州舊界寰宇記八平下尙有至姚州界二十里
姚州界在八平西由儻遲通接得與八平界並列八平

疑元志蒙自之巴甸巴八聲近雞街其後名洞澡水爲巖洞之樂蒙河巖洞去儻甸河曲壹統圖徑八分里數相合巖洞水上流爲瀘江河水道提綱云瀘江河經臨安府南又東折東北流有象沖河自南山北流來會曰樂蒙河東北至巖洞而伏又東流出巖洞巖洞爲石巖山麓之洞乾隆統志云石巖山在建水縣東十五里或謂之蒙山山麓有洞異龍湖瀘江諸水流入其中方輿紀要引舊府志云山峭壁千仞其受水洞合五河之水匯爲一泓折而入西阻華蓋連岡疊嶂縣亘數百里爲邠城右臂又滇紀云蒙山五里有巖洞亦謂之顏洞以

遷客顏闕所開而名洞有三曰雲津洞今名水雲洞眾水伏流其中曰南明洞曰萬象洞亦曰鉤町三洞樂蒙河出入此洞澄清可濯故名洞澡其水下流入阿迷州州南別有一路由多莧鋪東南至安平界滇程記云自教化三部而北有舍苴河箐口又北爲教化河外近州界有瑣羅城又北至歪頭山又北次多莧鋪乃至州治渡小盤江至彭堡接彌勒州界爲北走會城之通道此卽自升麻彌鹿二川南至步頭之路今爲蒙自東道鳥大經出馬白關行之沐晟出蓮花灘取道三岔河西當由小盤江上游過渡所行卽唐驛道章仇兼瓊開步頭

路築城於安寧其道宜亦取此又經南亭百六十里至
曲江南亭似舊戎州南界之亭置在樂蒙河口之北亭
西二十里許卽故建水城元志云故建水城唐元和間
蒙氏所築每秋夏溪水漲溢如海夷語謂海爲惠劇爲
大漢語曰建水歷趙楊李段數姓皆仍舊名城築於元
和間在此記之後其地當眾溪環匯之處每夏秋水漲
汎濫如大海疑亦不在今縣方輿紀要列段氏兩古城
一云在府城南五里瀘江鄉今爲無垢寺一云在城西
二里蓮花池二城一出段氏一當爲蒙氏舊築無垢寺
地形略高瀘江鄉最下或卽惠劇地亦偏南不當孔道

今建水時尙無城步頭之名知由後附元志又增入巴
甸巴甸亦不在是曲江爲樂蒙河所合之江名在今城
北明統志云曲江在府城東北九十里源自新興州由
岷峨縣石屏州會諸水至河西縣而東入於盤江曲江
橋在府城北九十里方輿紀要曲江橋下引府志文與
明統志同曲江驛下別云在府東北八十里下臨曲江
爲往來津要又曲江巡司亦駐於此乾隆統志曲江驛
下止云在建水縣北曲江故城內明洪武十四年置曲
江巡司駐此不著里數箐口關下云在縣東北一百里
曲江北設曲江巡檢司曲江巡司駐箐口關曲江驛亦

置於其地里數爲百八十當作九十八石門下亦有在
府西北百里箐口下臨曲江之文驛去箐口蓋二里八
字誤倒在上九字因脫去東北又並當作西北三文數
俱參差加入城以上二十里多止百二十少爲百十於
記數短四五十壹統圖曲江司去巖洞斜徑一方是百
六十里或兩統志及舊府志里數或皆有差今亦以圖
經爲據曲江之名唐以前書無所見明統志云曲江城
在府治北有二一築於漢一築於蒙氏築於漢之說不
確築於蒙氏之城此記亦不具或築在貞元以後抑其
城偏在東西不當渡口並不可考劍南地謂劍南節度

使所統之舊戎州都督地寰宇記戎州下云貞觀四年置都督府戎郎昆曲協黎盤曾鈞鬃尹匡襲宗靡姚微十七州天寶元年改爲南溪郡依舊都督羈縻三十六州一百三十七縣並荒梗無戶口戎州治劍南之南溪其都督府置在貞觀四年是在郎州都督罷後永徽初復置郎州及靡州兩都督此州乃徙洽夔道府卽罷廢王象之輿地紀勝十七州下據敘州圖經增高宗罷戎州都督府八字本末明備天寶初改爲南溪郡時復治南溪依舊都督羈縻三十六州則并郎靡二州所督舊州及永徽後續置之州入之時郎州已改爲南寧州中

又改爲戎州與此州同名所領有昆黎界至曲江還隸
此州後地旋沒於南詔本志所列止是舊跡記標劍南
與上標安南一例曲江以上二百四十里無州縣以下
爲黎州縣鎮之地又經通海鎮百六十里渡海河利水
至絳縣通海鎮謂南詔之通海都督鎮所南蠻傳南詔
有二都督通海其一元置通海縣隸寧州所治卽今縣
去今寧州止六十里箐口關至此里數爲五十故鎮城
差南不詳所在海河爲縣西北之通海湖壹統圖作杞
麓湖利水爲湖北江川縣南之海門河湖源出碌磧河
海門河首受星雲湖方輿紀要云碌磧河在河西縣北

碌磎山下自水磨村流入周迴八十里流經通海縣爲
通海河星雲湖在江川縣治南周迴八十餘里東流五
里繇海門入撫仙湖海門橋在縣東南五里臨安要路
也星雲湖水經其下海門河爲通海湖北路之要津古
無橋與通海湖並須舟渡乾隆統志聯綴利水與海河
於通海湖下誤以爲一名當析出利水卽黎水本志黎
州注云本西寧州武德七年析南寧州二縣置貞觀八
年更名北接昆州縣二梁水絳梁水今河陽縣與晉郡
之梁水異地絳卽江川元志止云寧州唐置黎州絳與
梁水俱關寧州亦治通海非今寧州乾隆統志始因明

統志之寧州推出兩縣所在此記通海鎮不言故黎州知黎州實今寧州黎水因州而名足以爲據通海至江川有東西兩道東道出寧州西道由河西方輿紀要云通海縣東北至澂江府江川縣百二十里據東道而言二字當作三乾隆統志云通海縣東北至寧州界三十里寧州西至通海縣界三十里北至澂江府江川縣界五十里江川縣下云東南至寧州界二十里四數爲百三十西路略長通海縣下又云西至河西縣界二十里河西縣下云南至通海縣界五里東北至寧州界五十里寧州界北卽江川界江川縣下又云南至寧州界七

十五里四數凡百五十方輿紀要河西縣下云東至澱江府江川縣百九十里江川縣下敘至河西里數亦同兩九字皆五之誤兩路計合曲江司里徑俱差贏減去通海以上又差縮均不能合記數壹統圖曲江司徑自杞麓湖直北至江川圖次適一方古路蓋徑由湖北渡不繞出左右百六十里實承曲江而言通海去河西止二十五里河西南詔時尙未立縣本志宗州三縣別有河西宗州北接姚州爲今鎮南州彼河西與此不相涉元志摭合爲一亦誤又八十里至晉寧驛驛卽今晉寧州治乾隆統志江川下云西北至雲南府晉寧州界三

十里晉寧州下云西南至澂江府江川縣界五十里兩
數正八十晉寧亦唐縣名本志隸昆州此作戎州據郎
州所改之戎州而言南蠻傳云爨蠻之西有徒莫祇蠻
貞觀二十三年內屬以其地爲旁望覽邱求五州隸郎
州都督永徽初大勃弄楊承顛寇麻州都督任懷玉招
之不應高宗以左領軍將軍趙孝祖爲郎州道行軍總
管與懷玉討之執承顛西南夷遂定罷郎州都督更置
戎州都督此戎州由邛州移西南近旁望覽邱求諸州
明統志云新興州唐貞觀中置求州屬戎州都督府求
州治新興旁望覽邱四州當由易門縣繞昆州西界迤

北本志云縻州南接姚州初爲都督府督靡望謬羅三州後罷都督縻州卽靡州今大姚縣治其州亦於郎府罷後置都督似卽楊承顛所寇之州傳作麻爲寫刻之誤望州析出隸彼府此州所領旁州偏在其東近武定州治餘以次而南府治宜亦近南與彼州相特本志及寰宇記俱不敘所在明統志云三泊縣在昆陽州西北七十里蔥蒙臥山在縣舊治北一十五里上有漢人舊城及王仁求碑後復出河東城下云在蔥蒙臥山東唐置州土人稱爲華納城城外有石碑題曰大周故河東刺史王府君碑此城近安寧州去新興百六十五里宇

文周時置河東州隋廢唐復置州不詳其名當卽戎州
州建置沿革爲舊志所遺寰宇記已不得其據明人自
不能詳昆陽州下牽入本志黎州都督府管內之河東
州云唐開元前置河東等二十二州隸鶴州改隸黎州
都督彼河東在四川清溪縣西爲霸拉河東非此河東
昆陽去新興止八十里去晉寧又減三十地在昆求二
州之間此城差北八十五里永徽以前不知屬隸何州
滇紀云天寶初鶴州都督竹靈蒨置府東爨開安南竹
靈蒨所治卽此故府東爨與西爨分晉寧爲界迤西北
至安寧安寧入西爨此入東爨不在其縣界之中易門

近邱州元志云世爲烏蠻所居易門入徒莫祇部有東
爨種族雜居此界宜亦與徒莫祇相錯城西北百六十
里爲祿豐縣元志云其地瘴熱非大酋所居惟烏雜蠻
居之遷徙不常至元十三年割安寧千戶之祿琿化泥
驥琿籠三處立縣驥琿籠舊屬安寧方輿紀要作驥宗
籠云城在縣東北山下又云縣東北三十里有陀陵山
本名驥琿籠山此城跨山脊疑卽安寧所距之龍和龍
與琿宗聲並相近和卽山坡陀之異目驥琿陀陵皆由
龍和衍改成別龍和不入邱州祿豐當如乾隆統志說
爲安寧地此城界接徒莫祇部或與昆陽俱屬求州晉

寧西南尙有鉤州界鉤州治今岢峨縣本志云東北接
昆州則東爨部地由梁水亘至望水界繞徒莫祇東境
迤入滇紀敘爨崇道事有昆州刺史爨祺求州爨守懿
同攻殺竹靈禱昆州以爭安寧而叛求州非所屬與之
聯合此城在其境中亦略可見本志求州無注寰宇記
并不列求州故皆遺闕此記戎州卽傳戎州晉寧爲其
驛地置此州時蓋曾由昆州割屬州廢後還本州不標
作昆州者昆州隸羈縻以蠻酋爲之刺史戎州置唐官
等於下州是以出入如此絳縣及通海鎮下俱不標黎
州其例可知戎州猶峰州所標止是小界劍南地爲大

界此州非綴府名又八十里至柘東城又八十里至安寧故城此由晉寧北入昆明縣西出至安寧西北故城昆明爲昆州治其郭下縣爲益寧柘東別爲南詔所築之新城南蠻傳南詔有六節度曰弄凍永昌銀生劍川柘東麗水柘東爲節度府城城築於閣羅鳳叛後元志云中慶路唐姚州閣羅鳳子鳳伽異增築城曰柘東至六世孫豐祐改曰善闡姚州謂姚府屬地正名當作昆州中慶治昆明柘東卽其城去晉寧不止八十里明統志云晉寧州在府城東南一百里乾隆統志作九十兩數俱差羸柘東當在昆明東南十里元置路時移西北

今城爲明洪武中改築又非盡元跡益寧似卽今城方
輿紀要云故城在府西其城又偏西今無跡可考柘東
故地蓋西爨所居之喻獻當晉寧入安寧之孔道在益
寧郭外西出沿滇池行故不經彼城安寧故城乾隆統
志云在今安寧州治南引雲南通志云今州城明萬厯
四年知州姚繼先改築於舊土城之北舊土城爲元所
築明統志云州在府城西南八十里是在今城之南十
里萬厯以前州治彼所今城不爲昆明西出所經舊城
更偏南非唐故城王氏昶滇行日錄云省治啟行三十
里至碧雞山又十餘里至玉泉山渡螳螂川經鳳山二

十五里至草鋪草鋪在州北去昆明七十里許去柘東
近八十里明統志云蔥山在州西北二十里高聳冠諸
山其北復起爲鳳城山鳳城以城名其下當本有城故
安寧宜在此明統志無鳳城有青籠城云在州北壹統
圖蔥山東少北爲青竜山其鳳城山列在蔥山西南三
山榦絡相連乾隆統志圖通標爲鳳嶺鳳城蓋大名明
統志所云鳳城卽壹統圖之蔥山其蔥山爲圖鳳城兩
名以通稱而互易青竜山不別標目包在鳳城之中乾
隆統志同明統志以蔥山爲州西北山其下增土人名
爲龍山六字龍山卽青竜山則并鳳城之支名亦與首

榦綴合爲一臺統圖始分析爲三青竜卽青籠其山正當州城之北草鋪在其下必青籠故址今無城廢圮已久又四百八十里至靈南城爲由祿豐經廣通縣楚雄縣鎮南州出姚州之普朔驛入雲南縣境本志戎州開邊注敘列貞元十年祠部郎中袁滋與內給事劉貞諒使南詔所經行之道云至柘東城又經安寧井三百九十里至曲水又經石鼓二百二十里渡石門至佉龍驛又六十里至雲南城其道與此同地名較詳里數計六百六十除安寧以上八十餘五百九十差多百十注二十疑本作一十今刻字誤此四字當作五因簡畫闕泐

爲後人改失靈字亦當從彼文作雲祿豐有龍和城偏北道所不經迤西應有覽州地及宗州諸縣袁劉所記亦皆從略曲水爲楚雄東之平山河壹統圖作青龍河乾隆統志云平山河在楚雄縣東三里此河去草鋪三百十餘里滇行日錄云草鋪三十里抵老鴉關過此爲獅子口三十里抵揀象關踰兩山趾行七十里至祿豐過江橋一名永豐橋行四十五里許卽入山盤屈上下行三十里許至梅子箐五六里至響水關本名蘭谷關自此西皆叢樾密箐高崖大壑行四十里抵舍資七十里至廣通又十五里至楚雄祿豐以下里數字亦多譌

以乾隆統志及滇程記參校四十五里許當作三十四
五里許三十三當作二四十七十五皆上下倒互四
十當作十五七十當作四十五當作七十滇程記云
自祿豐縣七亭而畸達捨資驛中途有窩子礮南平坡
六里菁響水橋響水鋪諸境自捨資驛四程而達廣通
縣爲路甸驛有十八灣坡清水橋之勝祿豐至舍資爲
里七十有奇舍資至廣通里數四十乾隆統志有廣通
與祿豐兩界細數祿豐西至廣通界三十五里廣通東
至祿豐界八十里祿豐去廣通都數百十五去舍資奇
數爲五響水關置在響水鋪菁口臨響水橋方輿紀要

作九盤關云在九盤山上二關爲縣境東西之險東關亦名蘭谷入祿豐界乾隆統志綴九盤山於廣通云在縣東五十里回旋險峻道路九盤立關其中蘭谷分綴於兩縣一云在祿豐縣東五十里一名響水關兩山夾水鳥道最爲險隘接祿豐縣之六里箐一云在祿豐縣西三十五里與楚雄府接界兩關依縣界里數計合相去三十祿豐至東關三十五里至山口不得加長梅子箐在山中至西關尙五六里去東口亦無三十里之徑舍資至廣通方輿紀要亦云四十里除此及西關以上二十五六里之數所餘惟十四五廣通去楚雄更有乾

隆統志及方輿紀要所據明統志舊本七十里兩明文
可證十五二字本綴在舍資句上亦無疑義西關山口
去廣通五十里關在口上差四五里乾隆統志通關下
地而言故數微有不同校正五文錄數爲三百十四五
除平山河西三里僅三百十一二加祿豐以上八十大
數正三百九十方輿紀要增祿豐至廣通里徑爲百三
十數不可合石鼓接曲水以安寧并去柘東里數準合
遠近宜卽元所置之石鼓縣地明統志云廢石鼓縣在
鎮南州東三十里又云石鼓山上有石排列如鼓舊石
鼓縣以此山爲名石鼓在楚雄西北五十五里滇行日

錄云楚雄出西門由嶽礮山址行五十里至呂合三十
五里至鎮南州石鼓去呂合五里方輿紀要云呂閣驛
在府西四十里呂閣卽呂合里數差短似有遠近兩道
乾隆統志云呂閣廢縣在楚雄縣西三十五里廢縣當
作廢驛里數又減少三字疑誤壹統圖呂合去鎮南徑
止十分方格之二有奇去楚雄加一是一爲三十五一
爲五十錄說近確石鼓元置縣旋廢今成墟落元志云
鎮南州昔樸落蠻所居川名欠舍中有城曰雞和至唐
時蒙氏征東蠻取和子雞和二城置石鼓縣又於沙卻
置俗富郡沙卻卽今州治至段氏封高明量爲楚公欠

舍沙卻皆隸之元憲宗三年其酋內附七年立欠舍千戶石鼓百戶至元二十一年改欠舍千戶爲鎮南州立定邊石鼓二縣二十四年革二縣爲鄉仍隸本州敘述甚備石門又在石鼓之西馮氏甦滇考云皮羅閣并有五詔更連陷遼川永昌石鼓沙追賤佉龍賤等處之地龍佉與石鼓俱於皮邏閣時併入南詔石門無所見韋臯傳臯遣幕府崔佐時由石門趣雲南南詔復通石門者隋史萬歲南征道也天寶中鮮于仲通下兵南溪道遂閉至是蠻徑北谷近吐蕃故臯復通之繇黎州出邛部直雲南置清溪關號曰南道彼石門在四川界內注

上云自開邊縣南七十里至曲州又四百八十里至石門鎮隋開皇五年率益漢二州所開崖佐時所由卽其鎮鎮去柘東千三百十五里非此道所經清溪又別一道乃史萬歲自蜻蛉川至小勃弄大勃弄所行自關至佉龍驛地名詳具檇州注所述貞元十四年內侍劉希昂使南詔記其中並無石門傳說誤合爲一方輿紀要以巨津州西百里之石門當清溪道石門亦非自佉龍驛至雲南城之路此石門又偏在佉龍東與清溪道之姚州差隔百里許於史萬歲西出之路復不相涉滇程記云自鎮南州三亭而踰達沙橋有鴛鴦白塔二坡自

茲徂西山确道修凡八亭而遙達普溯途經小孤山鸚
鵡關七里坡普昌關麥地哨道列巨箐危石俱險阨之
所鸚鵡關明統志作英武關云在州西七十里方輿紀
要引府志云關躡山脊越峻坂箐莽隱翳行者寒心爲
郡境之險鸚鵡關在峽中有門控扼疑卽古石門滇行
日錄云三十里至至沙橋六十里至天神鸚鵡塘三十
里至普溯天神鸚鵡塘爲鸚鵡關下之塘里數差二十
關道甚長七里坡蓋卽塘畔之坡普溯去沙橋八亭而
遙錄作九十滇程記所云爲修徑此其實數普溯舊有
驛乾隆統志云普溯驛在姚州西南一百五十里爲雲

南縣鎮南州必經之道舊有丞雍正十年添設姚州判駐此佉龍驛當卽此驛平山河至普湖里數都爲二百有八成數卽二百二十雲南城今雲南縣東南故城滇程記云自普湖驛六亭而達雲南縣界所經有桃樹坡金雞廟孟獲青安南坡下坡地復坦夷相傳古雲南郡治此土人稱爲小雲南以別於雲南治城小雲南舊亦有驛滇行目錄云普湖行六十里抵雲南驛驛爲明所置方輿紀要云雲南驛在雲南縣東其相近有古城村或以爲古雲南郡城也驛在縣東南東下當補南字古城村近驛舊與驛並入城內城徑亦不狹雲南爲漢

縣三國置郡南齊時已移治東古復梁後廢唐置郡於姚州此別爲雲南州尋改爲匡州本志匡州下云本南雲州武德七年置貞觀八年更名南雲依此記及袁劉記當作雲南明統志云唐初置雲南州貞觀八年改匡州所據本尚不誤方輿紀要據舊記錄麟德初武陵縣主簿石子仁請置姚州都督府狀云姚州西接雲南州之勝雲南州名麟德時尙存則貞觀後復有改易南詔置險亦稱雲南南蠻傳有雲南險制本如州亦通稱郡異牟尋以後郡名盛行險號多置不用或所稱古郡實蒙氏險城元志云唐以漢縣爲郡唐郡非此驛去縣

里數方輿紀要不具乾隆統志云荒田陂渠在縣東南四十五里雲南廢驛前驛至縣惟四十五里雲南故城下別云在今縣南八十里安南坡坡尙在山麓中去古城村有數里之徑坡下當本有下字八十數亦不侔村去驛約二三里八十當爲四十八郭松年大理行記云自鎮南州過雌嶺卽大理界山行七十里有甸焉川原坦衍山勢迴合周二百餘里乃雲南州也雌嶺爲普昌關嶺山行七十里卽麥地哨至安南坡之徑甸在山下與滇程記說並同乾隆統志引彼文七下亦脫十字兩文俱寫手失誤甚明元雲南州爲今縣治偏西北不當

孔道又八十里至白崖城由今城南清華山麓折西滇
行日錄云過驛數里遙見青龍海在杳靄間前過葉鏡
湖又數里抵清華洞十里抵倚江橋又三十里過彩雲
橋抵白崖青龍海明統志作青海子在縣東南二十里
遙見在杳靄間途所不經葉鏡湖方輿紀要云在縣南
三十里去驛爲十五里清華洞在縣南八里去湖二十
二里兩數並有根確之文可據錄兩數里數上皆當有
十字清華洞去彩雲橋四十里通上數爲七十七里加
至白崖站二三里是爲八十里白崖亦南詔險名與蒙
舍並見南蠻傳大理行記云自趙州山行六十里至白

崖甸甸形南北表與雲南品甸相埒西山石崖嶄絕其
色如雪因名白崖白崖以山立名下地亦長元初於故
險界中之彌渡市置白崖千戶後改立建寧縣尋省入
趙州白崖故城自在今站地明統志云在趙州東南九
十里所綴爲千戶所城非故險城乾隆統志引通志云
白崖土城在州南六十里白崖甸明嘉靖二年增設大
理府督捕通判四十三年築土城此城里徑於記符合
明所築必因舊址爲之又七十里至蒙舍城又八十里
至龍尾城袁劉記止具龍尾一文無上八字此分出七
十里爲蒙舍徑數又八十里當減作又十里城名有詳

略里數無可增八字涉上下文而衍蒙舍介兩城之間以地形度之必今趙州滇行日錄云從白崖行二三里過定西嶺行六十里至趙州循昆彌山麓行十餘里過飛來橋下爲西洱河循河南岸至下關卽龍尾關也其地太和縣屬趙州爲白崖至龍尾所必經城築於明宏治二年去白崖六十二三里古城偏西七八里卽七十里元志以州地爲趙川險蒙化州爲蒙舍城因趙州險後改置開南州趙州移治蒙舍險失蒙舍所在比附於蒙氏初入黃瓜蠻境所立之龍宇圖城而誤明統志蒙化府龍宇圖山下云在府城西北三十五里蒙氏龍伽

獨自哀牢將其子細奴邏居其上築龍宇圖城自立爲
奇王號蒙舍詔今上有浮圖及雲隱寺山爲蒙氏始居
之地城築於山下因山爲名亦稱蒙舍城統志下云蒙
舍城在府城北一十里唐改此城爲陽瓜州天寶間鳳
伽異爲州刺史今城之遺址尙存此蒙舍城卽龍宇圖
城在府城北一十里當作在府城西北三十里文有脫
誤城徑長二三里去山二里有奇故差近五里龍伽獨
時蒙舍險地尙爲張氏所據統志大理府名宦張仁果
下云據蒙舍自漢末起傳子孫三十三世其後進求爲
蒙氏所滅張氏滅於細奴邏所據蒙舍在大理界中與

龍伽獨稱詔之地別異爲閻羅鳳所置之蒙舍賧其城
舊名建寧滇考云韋仁壽至西彌河宣布帝治蠻彝望
風歸附建寧酋長張樂進求遣使隨仁壽入朝因以進
求爲首領大將軍建寧近西洱河爲昆彌蠻部諸城之
一方輿紀要云張氏世據雲南或稱昆彌國或稱白國
或稱建寧國昆彌昆蠻部之大號白國乃俗稱謝肇淛
滇略云阿育王奉佛教惡殺不茹葷腥日食白飯人稱
爲白飯王次子封於蒼洱之間傳世至仁果守家法不
尙染采不殺生因號白國白國之遠出西竺非仁果所
自自建寧爲城邑之名南蠻傳云開元末皮邏閣逐河

蠻取太和城又襲大螳城守之因城龍口夷語山坡陀
爲和故謂太和太和城包絡龍口坡陀兼龍尾城爲說
建寧先於永徽之世入南詔其城當在龍尾東南明統
志趙州治東南有建峰廟建峰以建寧山得名趙州必
其故地滇考引南詔野史以爲白崖因白國之名誤入
大理行記衍其說云白崖甸舊傳孔明置建寧縣於此
又推建寧之原於蜀置元縣據以立名遂與趙州分析
爲二蜀建寧爲郡名非縣名三國志蜀書後主傳建興
三年春三月丞相亮南征四郡四郡皆平改益州郡爲
建寧郡分建寧永昌郡爲雲南郡建寧治故益州之味

縣爲今南寧縣治去雲南甚遠晉書地理志雲南郡統縣九雲平雲南栲棟青蛉姑復邪龍牒榆遂久永寧無建寧建寧爲改益州所置之郡名自不得又爲分建寧及永昌所置之縣名御覽南蠻濮下引永昌郡傳云雲南郡在建寧南四十五里治雲南縣彼建寧亦是大名非縣界之說所能通南四十五里當作西九百五十里西誤作南百又誤爲四九字脫去十字復倒在五上建寧去雲南九百五十里則去建伶三百里與今南寧去昆明里數亦近蜀縣無建寧張氏以此名區因其地爲晉永寧取下一字而加上目南中志雲南郡下云蜀建

興三年置屬縣七雲南樸榆遂久弄棟蜻蛉其縣二別
爲郡縣二謂姑復邪龍並漢舊置永寧與雲平爲晉分
雲南樸榆所立略在外不數河陽郡下云刺史王遜分
雲南置屬縣四河陽縣郡治在河中源洲上也餘三縣
脫闕三縣據水經溫水篇注一爲雲平其二卽姑復邪
龍溫水篇注云河陽郡治河陽縣縣在河源洲上又有
雲平縣亦在洲中雲平鄰接河陽知分出後爲其郡所
屬姑復近青蛉邪龍爲宋新豐去河陽俱遠河陽由四
縣改置舊縣必永寧宋志云東河陽太守晉懷帝永嘉
五年寧州刺史王遜分永昌雲南立河陽分地無永昌

所屬永昌卽永寧之誤二字當本在雲南之下南中志
葉榆下云有河州葉榆治今太和縣河州謂西洱海河
陽在河源洲上是與葉榆同瀕洱海而隔浦海東南有
波羅江出趙州南定西嶺及九龍頂山合而北流繞州
東至北境折西入海此卽所謂河源雲平宜是州西之
河尾關城永寧爲趙州張氏建國於此固得名建寧建
峰廟似卽仁果之廟明統志云蒙氏時有東川人趙康
居此歿後土人立廟祀之趙康祀於此廟蓋張氏失國
後改易廟名建峰不名趙峰自非趙康所得擅大理行
記失考晉志據永昌郡傳誤文因以俗說爲正元志已

刪出止云至元十一年於白崖險立建寧縣卽古勃弄地白崖險兼有彌渡其地唐屬勃弄於白國自不相涉乾隆統志引通志又云建寧縣在今彌渡市亦名諸葛城彌渡之建寧復移附於諸葛益失其根彌渡乃勃弄之白旗城南蠻傳云白水蠻地與青蛉弄棟接西有大勃弄小勃弄二川蠻其西與黃瓜葉榆西洱河接趙孝祖破白水西入夷人皆走險小勃弄酋長歿盛屯白旗城率萬騎戰敗斬之進至大勃弄楊承顛嬰城守孝祖麾軍進執承顛餘屯皆破降之白水蠻地接青蛉弄棟爲姚州連場河西之蠻南界亘至白龍河源勃弄有大

小二川川俱南流合新豐水小勃弄偏東其川爲白崖
河大勃弄迤西川爲陽江陽江近龍宇圖山大勃弄界
接黃瓜黃瓜後爲陽瓜楊承顛時已入細奴邏大勃弄
以陽江隔限尙爲承顛所據其城卽今蒙化廳小勃弄
居白崖首城爲白旗當白龍河西出之孔道在雲南故
縣之南舍彌渡更無別城可指白崖與趙州隔定西嶺
兩勃弄與昆彌卽劃此嶺爲界葉榆卽西洱河南蠻傳
目爲昆明云一曰昆彌方輿紀要定西嶺下云本名昆
彌山明初平西侯沐英過此更今名定西名由後改今
北山尙沿舊名昆彌界盡此山嶺脊不得跨白崖豈能

更錯入彌渡建寧確爲建峰下地故城在峰西入南詔
又同龍字圖名爲蒙舍者野史云低蒙苴生九子名九
隆氏八子蒙苴頌白崖張樂進求之祖張氏本蒙族得
賜姓爲張龍伽獨未立號以前西洱河諸蒙奉以爲宗
先有蒙詔之目細奴邏并其地入新詔至皮邏閣以龍
字圖置趙郡復析出新城詔治處所仍移入舊城與故
詔合一故閣羅鳳置賧名此爲蒙舍趙川由趙郡改異
加綴川名其地時已擴至陽江之東徙治大勃弄城曰
崖或承舊名通稱勃弄此賧亦兼有勃弄之稱方輿紀
要綴元趙賧城於趙州其下引州志云州初無城郭明

初遷州治於三耳山或以爲卽古勃弄州治勃弄爲唐縣非州名或所云州卽趙川險後通稱爲趙州者從舊名爲勃弄州紀要別列勃弄廢縣云在大理府東百里亦曰勃弄州府東百里爲白崖於縣治可合於州不相應乾隆統志又移勃弄故城於雲南縣東百里更出勃弄界外雲南縣東百里乃白水蠻地勃弄縣與州俱不能入兩說皆緣蒙化治所失去勃弄故跡致兩部闕其一趙州本治大勃弄後以銀生節度地陷入金齒白蠻移開南於郭下徙州入蒙舍因有三耳山下之治蒙化爲故趙川明人亦尙有傳說元志據南蠻傳十險之文

綴勃弄於白崖不更據勃弄之大小二川分出兩部一
在蒙化實爲疏脫蒙化有羅羅摩蠻方輿紀要引蒙化
府志云初羅羅摩及棘人蠻居此羅羅摩或省作羅羅
亦勃弄蠻族號元志作羅落移綴於趙州下兩州事跡
又明有舛互開南州下云蒙氏立銀生府後爲金齒白
蠻所陷移府治於威楚開南遂爲生蠻所據開南與銀
生樊書並列於城鎮並非一地銀生爲節度府治開南
別爲郡城銀生移威楚開南未有所歸蒙化州下云段
氏改爲開南縣段氏之開南承南詔之郡爲名豈非移
此志不具舊治沿革開南名何所承此尤其失漏之顯

然者兩文確當更正蒙舍爲張氏故城有明統志文可據城去龍尾十里無疑龍尾城卽故雲平城乾隆統志云龍尾關在太和縣南三十里當洱河之尾一名河尾關唐時名爲龍尾城城瀕西洱河自州波羅江入西洱海有水路可達大理行記云自趙州府行三十里有河尾橋橋西爲龍尾關南詔皮羅閣所築最險固高壁危構尙存舟行徑曲較陸道差多十二三里城壁甚高乾隆統志引舊志云周二里方輿紀要云有二門其跡今尙未湮又十里至太和城又二十五里至羊苴咩城又十下當有五字袁劉記作又四十里至羊苴咩城羊苴

畔去龍尾四十里太和至羊苴畔里數二十五是去龍尾十五五字因寫者衍八字於上排比節去明統志云太和城在府城南一十五里乾隆統志言城在太和村村去關實十五里羊苴畔城元志謂卽大理府治明統志云城有九重南詔異牟尋自太和徙此城紀要云九重猶言九座引大理府志說一在河尾里一在關邑里一在太和村一在北國一在蟠溪里一在塔橋一在摩用其二城則羊苴畔城史城也府志所云九重與明統志說不同明統志繫九重於羊苴畔下自謂此城重數有九南蠻傳言皮邏閣徙治太和城異牟尋更徙苴畔

城表築十五里太和與羊苴畔各爲一城關邑在太和南河尾又在關邑南俱不在其數北國蟠溪塔橋摩用四城並不詳所在史城爲大釐臉城亦別在外羊苴畔城表十五里蓋由今府城迤亘至北郭點蒼山三陽峰麓里數十五今城徑三里三陽峰去城十三里合爲十六里故城當表至峰南一里峰名三陽傳云苴畔臉亦曰陽臉羊苴畔卽陽苴畔其名宜出於此城北近峰麓中分外內城及王城凡有九重今府城爲其第一二重異牟尋所居之城在第六七重城中爲王居四周皆臉地此記專據王城而言故與明統志所言太和里徑差

多十數自羊苴畔城西至永昌故郡三百里三字亦誤
城去永昌不止三百里今驛道由府城南取河尾關西
南合江鋪路轉西北過漾備勝備二江橋入永平縣界
滇行日錄所謂由下關過天生橋五十里至合江鋪六
十里至漾濞館舍行里許過雙雁橋二十里過大覺寺
經太平鋪二十里抵橋下爲勝備江又前抵野牛坪又
十餘里過羅武山者與此程徑復不相同此由故王城
西出應踰點蒼山中榦迤西南行自漾備街西北渡漾
備江至羅武山東渡勝備江行記罕有言及蠻書蘭滄
江下云龍尾城西第七驛有橋卽永昌也蠻書所言宜

是此道橋謂保山縣東之第一橋今名霽虹橋跨瀾滄江上去羅武山二百數十里方輿紀要云永平驛在縣治東五里又東九十里爲打牛坪驛又六十里爲蒙化府之樣備驛六十滇程記作九亭當同打牛坪作九十今驛長至八十里以上古驛止三十里無六七十之制七驛數不可計乾隆統志大理府下云西南至永昌府界一百五十里永昌府界卽羅武山東之勝備江百五十里較河尾關路差近四十餘里羅武山以下滇程記滇行日錄及西輜日記並具細數羸縮亦復不齊滇行日錄與乾隆統志說多合乾隆統志永昌府羅武山下

云在永平縣東一百里與勝備江同徑江西岸卽山麓
滇行日錄云羅武山十餘里抵黃連鋪四五里登寶藏
山一名觀音山二十里過萬松哨又二十里過松杉哨
至梅花塘是爲天井鋪又過平蠻哨尋甸關經寶峰寺
共四十五里抵永平縣首尾正百里滇程記云打牛坪
十亭而畸達縣十亭兼羅武山以上十里而言較滇行
日錄差短一亭下以有畸二字增補其闕畸數占五六
里去亭數亦不遠方輿紀要減實爲九十五里因驛數
改衍而歧西輜日記云過勝備河橋行山脇間路繚而
曲十五里黃連鋪上下斜坡至縣百一十里黃連鋪以

上又減去五里以下復增益二十里所差不能細校乾隆統志亦有黃連堡在縣東一百里及打牛坪堡在縣東九十里兩文遠近相反蓋山路繚曲無一定準數舊府縣志說各不同當以滇行日錄所云爲正黃連鋪至縣西輜日記爲一日程至上有日昝二字百十里亦必非足數縣去府治方輿紀要從明統志說云一百七十里乾隆統志亦仍之保山縣下別有細數云東北至永平縣界一百六十七里百六十七成數卽百七十爲永昌去所屬界首之數非去其縣之數明統志誤移於縣治滇程記云自永平縣七亭而崎達沙木和自沙木和

十亭而畸至永昌七亭十亭卽因誤說分衍而加兩亭以彌縫差數縣西至保山界乾隆統志云五十五里去府實二百二十二里去沙木和爲百十二里滇行日錄云永平縣行數里上金浪山本名博南四十里至花橋五十里過寧西禪院三十里至杉木河杉木河明統志作沙木河卽沙木和舊爲巡司駐所里數增出近由花橋去縣舊數與今數有差明統志云花橋關在縣西南四十里乾隆統志花橋山下減作三十五花橋河下又減作三十所差爲此數二里乾隆統志從略西輶日記云永平縣西南行上高坡兩次七十里宿杉陽爲保山

所轄有巡檢把總一員杉陽卽沙木河里數爲七十沿
用滇程記說上高坡兩次是過花橋河再上金浪山南
嶺乾隆統志所云在縣西南四十里通志崇峻坂委
曲嶙峋上下約三十里者此山坡尾去縣已七十里沙
木河在南司治又迤南豈此數所能展合司去瀾滄江
橋三十里方輿紀要云沙木和驛在沙木河側巡司亦
設於此河在府城東北百十里霽虹橋八十里百十里
減去橋以下徑數適三十滇行日錄云由杉木河行過
鳳鳴橋三十餘里山勢斗峭蓋羅岷山也俯瞰蘭滄江
志稱武侯南征始加木於江以濟師明成化中僧了然

鑄鐵索環兩岸石上蓋以板蔽以亭石壁上題云西南
第一橋其長三十餘丈三十餘里與方輿紀要說相近
西輻日記又減作二十五里亦未詳所據橋西有二道
滇行日錄云十五里抵威寧哨四十里至官坡十餘里
見青華海館於府治青華海在府東五里官坡去海二
十里此卽方輿紀要所云八十里之近道西輻日記云
過橋復上峻嶺二十里水寨六十里至板橋又二十里
至府里差多二十則別爲一道乾隆統志沙木河下云
在保山縣東北一百二十里百二十於滇行日錄之數
有增所綴似此路西輻日記兩二十字又疑有一誤滇

程記云瀾滄西爲江坡有逕路新闢爰捷一亭新闢之路爲威寧哨道此其舊路捷一亭是差十里與乾隆統志說相符然於本說之十亭益不可合明統志所綴確爲誤說永昌去大理今里數爲四百七十二加入水寨舊道十里又加花橋差數十里都爲四百九十二三陽峰南徑更加十里整數實五百古驛自保山置至河尾數凡十八霽虹橋差近三驛蠻書七驛字有譌脫永昌郡傳云郡在雲南西七百里七百除去羊苴咩以上二百亦餘五百唐以前舊里數本如此舊傳有驛國東北距南詔陽苴咩城六千八百里及在永昌故郡南二千

餘里兩文六千當同下數作二千永昌至驃國二千一
百里詳見下記餘數兼有所略之里徑或數十或百數
十羊苴啤增差七百減實亦近五百此三字必本作五
故郡卽今府治

唐賈耽記邊州入四夷道里考實卷三